

ASO LULU, 04 ME 2022

Na nofoia e le Fofoga Fetalai le Nofoa i le itula e 9:30 i le taeao.

Tatalo.

FOFOGA FETALAI: Ou te faasilasila atu ua amatalia nei Taulumaga a le Fono Aoao Faitulafono.

Ou te tofu i Avalua ae matau i Avaee, leaga e faigata le apoapogata o lauafelua o paia fesagai o le Maota, afai foi e le tali mataoge, e tatala matanefu, ina ne i tu le toa nai le auvaemauga, ona talitua lea o e na alii o aiga. E ui i le ao na faasavali ma faatata tafue i talitaliaai, ae o le loto faafetai ua mafai ona tatou fesilafai i le matagofie o le Atua i lenei taeao. O Lona lava alofa ua fesilafai ai le tatou Maota i le filemu ma le olioli e pei ona tatou faamua ai le viiga ia te Ia, o le laualuga lea o le faamuamua a le tagata, o le Palealii o Lana foafoaga paia.

E le toe tau sulaina paia o le Maota i lenei taeao, ae ofo alofa ma faatalofa atu i le afio o lau Afioga i le Tamaitai Palemia, afio lau Afioga i le Sui Palemia, afifio Minisita o le Kapeneta, e faapea foi Afioga i Minisita Lagolago. Afio lau Afioga i le Taitai o le Itu Agai, Sui Taitai ma sui usufono mamalu uma o le Palemene. Malo le soifua i lo outou lagi e mama.

E faigata le faafofoga tapuai mai a Lana Afioga i Le Ao Mamalu o le Malo ma le Masiofo, Sui Tofia ma lona faletua, le Faamasino Sili ma le mamalu o le Faamasinoga. E faapea foi le paia o le atunuu aua Aiga ma Tama, o Tama foi ma Aiga, le usoga a Tumua ma Pule, Itua ma Alataua, Aiga i le Tai ma le Vaa o Fonoti.

Le tapuaiga a le aufaigaluega a le Atua i so o se fatafaitaulaga, e ofo alofa ma faatalofa atu lau Palemene i lenei taeao. E i ai le talitonuga ua maleifua mai i le manuia i lenei aso fou, viia le Alii i mea silisili ua Ia faia.

E faatalofa atu foi i le tapuaiga a Ofisa Sili o Pulega o Matagaluega ua tatou faatasi i lenei taeao, malo le soifua manuia. E i ai foi nisi o sui usufono mamalu ua le mafai ona tatou auai ona o gasegase o le tino ma tuatuagia le maalofia, ia alofagia e le Atua ia pai atu i ai Lona aao faamalolo, ma ia i ai Lona agalelei.

I lenei aso ma le alofaiva o le Palemene, tatou lalafo i le Atua lo tatou faamoemoe, ua na o i tatou o ni auauna, ae o Ia e manuia ai. Manuia le usugafono a le tatou Maota i lenei taeao, manuia le tapuai mai a le atunuu i ona tafa e fia.

ISI FAASILASILAGA A LE FOFOGA FETALAI

FOFOGA FETALAI: O le aso Faraile 29 o Aperila 2022 na ou lipotiina mai ai le faitioga tusitusia a se tasi o sui usufono mamalu e faatatau i le lagaina o se mataupu tau tulaga aloaia e tusa ai ma Tulafono Tumau 178(1).

O le aso Gafua 2 o Me 2022 na ou taulimaina ai tali tusitusia a sui usufono mamalu o lo o faasaga i ai le faitioga e pei ona talosagaina mo se iloiloga a le Fofoga Fetalai mo sana faaiuga i lenei lava mataupu.

Mo le silafia e le Palemene, o lenei mataupu na tauala mai i le sui usufono mo le itumalo palota o Gagaemauga 1, o le Afioga foi lea i le Sui Palemia, Honourable Tuala Tevaga Iosefo Ponifasio, e faasaga i le sui usufono mo le itumalo palota o Lepa, le Susuga ia Honourable Tuilaepa Fatialofa Auelua Sailele Malielegaoi ma le sui usufono mo le itumalo palota o Faleata 3, le Tofa ia Lealailepule Rimoni Aiafi.

I le usitaia o aiaiga o Tulafono Tumau 178(2), na iloilo e le Fofoga Fetalai le tulaga o lenei mataupu mo sana faaiuga, po ua fesiligia ai tulaga aloaia o le Palemene.

E tusa ai ma Tulafono Tumau 181(1), e tatau i le Fofoga Fetalai ona lipoti atu lenei mataupu i le Fono Aoa o se avanoa muamua lava e mafai ai pe afai ua i ai lana faaiuga e faapea, ua fesiligia tulaga aloaia i lenei mataupu.

O lea ou te lipoti atu ai lenei mataupu i le Fono Aoa e faapea, i le maea iloiloaina o lenei mataupu, ua taunuu atu ai le faaiuga e faapea; ua fesiligia tulaga aloaia o le Palemene i lenei mataupu.

O le mea lea, e tusa ai ma Tulafono Tumau 181(2), o le a tuuina atu ai lenei mataupu i le Komiti o Tulaga Aloaia ma Amio Taualoa mo le iloiloaina ma toe lipoti mai i le Fono Aoa i se aso Fono e sosoo ai.

O taiala o iloiloga a le Komiti Suesue o Tulaga Aloaia ma Amio Taualoa e aofia ai;

- 1. Silasila i le aafia ma le solia o tulaga aloaia o le Fono Aoa Faitulafono i lenei mataupu.*
- 2. Silasila i le aafia ma le solia o uiga le migao faasaga i le Palemene i lenei mataupu.*
- 3. Silasila i aafiaga o le Tulafono o Pule ma Tulaga Aloaia o le Fono Aoa Faitulafono 1960 i lenei mataupu.*
- 4. Silasila i aafiaga o se sui usufono ua faamaonia le solia o tulaga aloaia o le Fono Aoa Faitulafono ma uiga le migao faasaga i le Palemene ona o lenei mataupu.*
- 5. Silasila i aafiaga faaletulafono o lenei mataupu i se amioga po o ni amioga e le tatau ona faia e se sui usufono o le Palemene.*
- 6. Le tuuina mai o se faaiuga talafeagai e tusa ai o aafiaga o lenei mataupu.*
- 7. Ia toe lipoti mai le Komiti Suesue Faapitoa i le Fono Aoa i le aso Fono e sosoo ai.*

E tusa ai ma Tulafono Tumau 177, o suafa o sui usufono ua taua i lalo ua tofia ma filifilia e le Komiti o Tulaga Aloaia ma Amio Taualoa;

1. *Honorable Valasi Luapitofanua Toogamaga Tafito Selesele, o le a fai ma sui o le Taitai o le Maota.*
2. *Honorable Lautafi Fio Selafi Purcell, talu ai o lo o aafia le Taitai o le Itu Agai i lenei mataupu ma faapea foi ona aafia le Sui Taitai i mataupu faafaamasinoga e aafia i lenei mataupu, o le mafuaaga lea o le tofia o le sui usufono mamalu ua faailoa atu e fai ma sui o le Taitai o le Itu Agai.*
3. *Honorable Tuuu Anasii Leota.*
4. *Honorable Faimalotoa Kika Iemaima Stowers-Ah Kau.*
5. *Tofa Ale Vena Ale.*
6. *Tofa Seuamuli Fasi Toma.*
7. *Afioga Magele Sekati Fiaui.*
8. *Afioga Masinalupe Makesi Masinalupe.*
9. *Afioga Agaseata Valelio Tanuvasa Peto.*

Ua ou matau atu o tau tulai mai lau Afioga i le Sui Fofoga Fetalai. Tulai mai lau Afioga i le Sui Fofoga Fetalai

Afioga AUUAPAAU MULIPOLA ALOITAFUA MULIPOLA (Sui Fofoga Fetalai): Lau Afioga i le Fofoga Fetalai, ou te tulai atu ma le faaaloalo e faatu le lafo, *Ina ia faataatia i luga o le Laulau-a-Fono le faitioga tusitusia a le sui usufono mo le itumalo palota o Gagaemauga 1, faatasi ma tali tusitusia a le sui usufono mo le itumalo palota o Lepa ma le sui usufono mo le itumalo o Faleata 3, ma ia faamaonia e le Fono Aoao le Komiti ua tofia mo lenei galuega taua. O le taua o lenei mataupu, ina ia faataatiaese Tulafono Tumau 30(2) ma avanoa ai le toe tauaofia o le Palemene i le aso 17 o Me 2022, e toe lipoti mai ai le Komiti o Tulaga Aloaia ma Amio Taualoa.*

Ma le faaaloalo lava lau Afioga.

Faaluaia e le Afioga i le Minisita mo Faatoaga ma Faiga Faiva.

Na faamaonia le lafo.

POLOAIGA O FAALAVELAVE TUTUPU FAAFUASEI

FOFOGA FETALAI: E faasilasila atu i le mamalu o le Palemene ua ou taulimaina nei le Poloaiga o Faalavelave Tutupu Faafuasei mo le Koviti-19, e pei ona faamaonia e Lana Afioga, O Le Ao o Le Malo, Tuimalealiifano

Vaaletō'a Sualauvi II, i luga o le Fautuaga a le Kapeneta e pei ona taua i lalo mo le faataatiaina i le Laulau-a-Fono.

1. Poloaiga o Faalavelave Tutupu Faafuasei Numera 78, na amata faamamaluina i le itula e 12:00 i le taeao o le Aso Lulu, 4 o Me 2022 seia aulia le itula e 11:59 i le po o le Aso Lua, 17 o Me 2022.

TUUNA ATU O LIPOTI A KOMITI FAA-PALEMENE

Na tolaulauina e le Failautusi le faasologa o Lipoti a Komiti Faa-Palemene e tusa ai ma T.T.52(5).

1. P.P.2022/2023 Nu.1, Lipoti a le Komiti Suesue Faapitoa a le Palemene i le P.P.2021/2022 Nu.36, Lipoti o le taunuuga o le suesuega e faatatau i le Mataupu sa laga e le Loia Sili e uiga i Teuteuga o le Faavae 2020 & Tulafono o Fanua ma Suafa 2020.

Ma le faaaloalo lau Afioga.

TULAFONO TAU FAAOFI O TEUTEUGA O LE TULAFONO O SOOTAGA VA LELEI O LEIPA MA GALUEGA 2022 – felafolafoaiga faaauau i luga o le faitauga faalua

FOFOGA FETALAI: E tolopo a tatou tualumaga i le aso ananafi o lo o saunoa le sui usufono mo le itumalo palota o Anoamaa 1.

O le avanoa leni e tulai mai ai lau Afioga i le sui usufono mamalu mo Anoamaa 1 mo le faaauauina o lau saunoaga.

Tofa Lealailepule Rimoni Aiafi (Faleata 3): Lau Afioga i le Fofoga Fetalai ou te tu atu ma le faaaloalo pe fia maua sina avanoa laitiiti lava i sina fesili e tuu atu. Faamolemole lava.

FOFOGA FETALAI: Ou te faamalulu atu i le sui usufono mamalu, masalo o oe se tasi o sui usufono matua o le Maota leni, e le mafai ona talanoaina ona o lea ua pasia le tatou lafo.

Susuga Hon Tuilaepa Fatialofa Auelua Sailele Malielegaoi (Taitai o le Itu Agai): Lau Afioga i le Fofoga Fetalai, na ona ou tulai atu i le faatopetope mai o au mataupu, ma o lena foi ou te matau atu pei e tetete lou leo. Na o sina faamatalaga pe mafai ona ou tulai atu e fai se faamatalaga, ae ona o lea ua uma ona faasalalau mai pepa foi o le talosaga a o, a o lea e leai se pepa o

le talosaga a i inei, a o lena ua i lau Afioga. O le talosaga atu lea pe mafai ona maua se avanoa.

FOFOGA FETALAI: Ou te faamalulu atu i lau Afioga i le sui usufono mai Lepa po o lau Afioga foi i le Taitai o le Itu Agai. Talu ai o lo o i ai le avanoa pe a tuuina mai le Lipoti a le Komiti lenei, ona maua lea o le avanoa e avanoa ai. E maua foi le avanoa i le komiti, e le mafai foi ona tuua le avanoa aemaise foi o e o aafia i lenei mataupu, o lea foi ua tuuina atu i ai a oulua tali tusitusia ina ia talanoaina, ma oulua fesiligia ai foi le komiti, a o le i tuuina mai le lipoti. E faatoa maua le avanoa pe a talii mai a tatou galuega pe a foi mai i le Maota.

Susuga Hon Tuilaepa Fatialofa Auelua Sailele Malielegaoi: Lau Afioga i le Fofoga Fetalai, faamolemole lava, ona o lea sa laulau mai le...

FOFOGA FETALAI: Ia malie mai lau Afioga i le Taitai o le Itu Agai o lea ua fai atu le faatonuga a le Nofoa.

Susuga Hon Tuilaepa Fatialofa Auelua Sailele Malielegaoi: Talosaga a o, a o lea e le i laulauina le talosaga a i inei. O le tulaga lena e aliali ai le mea o le Fofoga Fetalai e le faaituau...

FOFOGA FETALAI: Ia alala mai i lalo, alala mai i lalo le Taitai...

Susuga Hon Tuilaepa Fatialofa Auelua Sailele Malielegaoi: E le faaituau.

FOFOGA FETALAI: Ua tele lou le mafaufau i totonu o le Palemene.

Susuga Hon Tuilaepa Fatialofa Auelua Sailele Malielegaoi: E tele foi lou le mafaufau.

FOFOGA FETALAI: Ia oe i faatu se lafo e.... ua ou vaai atu tele ia oe e te matua i totonu o le Maota, ae fai fuafua mai o lea e ava atu.

Tofa Lealailepule Rimoni Aiafi: Lau Afioga i le Fofoga Fetalai...

FOFOGA FETALAI: Ou te le taliaina se isi mataupu lau Afioga i le sui usufono mamalu.

Tofa Lealailepule Rimoni Aiafi: Se malie lau Afioga, ou te le agai lava i le mataupu lea ua saunoa i ai lau Afioga i le taeao nei, e le o le mataupu lea lau Afioga.

Ona o lea ua saunoa lau Afioga i le tali o le mataupu, ua leva ona folafola e Laauli anapo. O le tulaga mamalu o le Palemene, na o lau Afioga e sau ai faaiuga fai, ma aso o le Fono. E faapefea ona fai nei mataupu na folafola e Laauli anapo mea nei. O mea nei a le Palemene, o le mamalu o le Palemene ae folafola e ia? Ia ma lau talosaga lena i lau Afioga e tusa o le Sui Palemia, o lena e le o laua mai, a o lea ua lau mai a ma talosaga, a o fea le talosaga a o. Ma le faaaloalo lava.

FOFOGA FETALAI: Ou te fesoasoani atu i le sui usufono mamalu, e... se i tulai mai lau Afioga i le Minisita.

Susuga Hon Laauli Leuatea Polataivao Fosi (Minisita mo Faatoaga ma Faigafaiva): E tulai lava i le ava foi ma le faaaloalo i lenei taeao fou. Ia aumaia pea le filemu o le Atua e faatoatoa ai le taeao lenei e ala i lau talosaga na molia, e saisai ai ni agaga faasalavei, ma ni agaga taufaavevesi o agai mai o lea e toafimalie le taeao. Ae avatu pea vai malu i lau Afioga i le Fofoga Fetalai, ma avatu le faamalosi. Ia malie lau Afioga i le Fofoga Fetalai, ia to'a pea le tai. O a galugalu o le taeao ma le aso, ia lava lau tofa. O le ala lea...

Susuga Hon Tuilaepa Fatialofa Auelua Sailele Malielegaoi: Lau Afioga i le Fofoga Fetalai, se e le o matou o ni tamaiti, o mea o upu faauigalua o na e i lalo o tatou Tulafono Tumau.

Susuga Hon Laauli Leuatea Polataivao Fosi: A tulai mai faapea le le migao i le Maota...

Susuga Hon Tuilaepa Fatialofa Auelua Sailele Malielegaoi: O le tutulai mai o se Minisita, e faatupu faavevesi i totonu ma faaoga faaupuga faauigalua....

Susuga Hon Laauli Leuatea Polataivao Fosi: O lea e avatu le agaga e faatoafimalie le taeao lenei.

FOFOGA FETALAI: Ia malie ia, onosai mai, se i faauma mai pea le saunoaga

Susuga Hon Laauli Leuatea Polataivao Fosi: Lau Afioga i le Fofoga Fetalai, o lena e i ina le tofa ma le faautautaga e faatoafilemu ai le taeao lenei. Se malilie sui usufono, o oulua lea e tausalaina i le mataupu, a na sagatonu le lua amiotonu, e te lua le saunoa i le taeao lenei. O oulua lea e taitaia le mataupu lenei.

Susuga Hon Tuilaepa Fatialofa Auelua Sailele Malielegaoi: Lau Afioga i le Fofoga Fetalai, a faapefea ona e fai mai, o oe le isi tagata e aupitosili ona le amiotonu e fai i totonu o le Maota lenei.

FOFOGA FETALAI: Ia onosai o lea o le a fai le faaiuga a le Nofoa. Ia malilie o le a fai atu pea le faaiuga a le Nofoa.

Susuga Hon Laauli Leuatea Polataivao Fosi: Tuilaepa, Tuilaepa, Tuilaepa, faifaimalu ou faiva.

Susuga Hon Tuilaepa Fatialofa Auelua Sailele Malielegaoi: Nofo i lalo.

FOFOGA FETALAI: Ia tatou toatoa pea ma lavapapale.

Susuga Hon Laauli Leuatea Polataivao Fosi: E le i faamaonia sau solitulafono. O oe lea ua aumai le faaiuga a le Maota lea e tau fai ai nei le mataupu i le aso.

FOFOGA FETALAI: Ia faamalie atu i lau Afioga i le Minisita.

Susuga Hon Laauli Leuatea Polataivao Fosi: O le ala lea o lou tutu atu ma oloolomamau e le faigofie tulaga ia, leaga o lea ua e saunoa le mafaufau i le Nofoa. O le ala lea o lou tulai atu.

Susuga Hon Tuilaepa Fatialofa Auelua Sailele Malielegaoi: Lau Afioga i le Fofoga Fetalai, se e ava atu i lau Afioga.

FOFOGA FETALAI: Ia malie ia lau Afioga i le Minisita.

Susuga Hon Tuilaepa Fatialofa Auelua Sailele Malielegaoi: A saunoa le...

Susuga Hon Laauli Leuatea Polataivao Fosi: Ia faifaimalie, ia faifaimalie o lena e te le mafaufau i le Fofoga Fetalai. O le ala lea o lou tulai atu. E le o se Fofoga Fetalai faataatia lea e i i, o le Fofoga Fetalai a le atunuu. O le ala lea o le matou tutulai atu.

Tofa Lealailepule Rimoni Aiafi: Lau Afioga, ae a le mea lea e fai e oe i po ma TV?

Susuga Hon Tuilaepa Fatialofa Auelua Sailele Malielegaoi: E lelei ona....

Susuga Hon Laauli Leuatea Polataivao Fosi: O lena e i ina le tofa ma le faautautaga. E le faigata lou tulai atu e faatu loa le lafo, pau lea. Ae ava tele atu i lau Afioga ma le Taitai, faifaimalu o tatou faiva o le lava e...

FOFOGA FETALAI: Ia malie ia lau Afioga i le Minisita, ia onosai ma maua pea e i tatou le lavapapale. E faamalulu atu foi ia outou Afioga, ia tatou lavapapale pea ma lava le onosai. Ia malilie, malilie tatou sui usufono, se se i alolofa mai...

Afioga Sulamanaia Fetaiai Tauilili Tuivasa: Ta pigi kokogu i i...

FOFOGA FETALAI: Sole... malilie ia aua e te faapena ma au amio. Leala...

Afioga Hon Fiamē Naomi Mataafa (Palemia): Lau Afioga i le Fofoga Fetalai, o le a le uiga o le sui usufono lea e ee ai i totonu o le Maota? E faatu atu le lafo, *E sau le Satini e ave i fafo, ua tele lou le mafaufau.*

Faaluuaina e le Sui Palemia.

FOFOGA FETALAI: Satini ave i fafo le sui usufono lea.

Afioga Sulamanaia Fetaiai Tauilili Tuivasa: Lau Afioga i le Fofoga Fetalai, e le faapena le faiga o tatou... o lea ou te fai atu, o lea e te saunoa lau Afioga i le Fofoga Fetalai, ae o lea e saunoa mai le Minisita agai i le sui usufono lea. O le uiga lena o lou tulai atu ma lou fai atu. A e malele e le mafai ona toe talanoa se isi. A o lea e te malele lava, ae sau lava faaupuga a le Minisita le la i i i le sui usufono lea.

E pei o le agaga lena na ala ai ona ou fai atu faamolemole.

Susuga Hon Laauli Leuatea Polataivao Fosi: Tuisamau, tuutuu mamao lau tofa, o lea e fuafua atu lo outou le mafaufau i le Fofoga Fetalai. E tali upu ia e fai faapea le Fofoga Fetalai?

Susuga Maulolo Tavita Amosa (Sagaga 2): Lau Afioga i le Fofoga Fetalai, e puupuu lava sina avanoa.

Susuga Hon Laauli Leuatea Polataivao Fosi: Ia tuutuu mamao le tofa o lea e faafofoga Samoa.

Susuga Maulolo Tavita Amosa: E i ai i lo tatou Faavae tulaga o le faa-Kerisiano ma le faale-aganuu.

FOFOGA FETALAI: Ia taatia maia i le Nofoa o le a faamaea atu le tatou mataupu.

Susuga Maulolo Tavita Amosa: Ua tatalo atu faamolemole, o le manaia ia o lau folasaga i le amataga, tatalo faaoololomaau i le Atua. O lo o tapuai Samoa. E tatalo atu, e pau lava lea o le agaga o Tuisamau. Ia manuia le tatou Fono.

Afioga Sulamanaia Fetaiai Tauiliili Tuivasa: Lau Afioga i le Fofoga Fetalai, pe maua se avanoa.

FOFOGA FETALAI: Ia, e talu ai, o lea ua faatu le tatou lafo, o oe foi o se tasi o sui usufono matua o le tatou Maota.

Afioga Sulamanaia Fetaiai Tauiliili Tuivasa: E pei o le agaga lena.

FOFOGA FETALAI: E talitonu foi o lea ua faatu le lafo ma ua faaluaina, o le mea lea se o tatou e faapena, e le uma le fai aso o le Alii, tatou te fesagai pea ma tatou talatalanoa mo le agai i luma o le tatou Palemene. O le mea lea ia...

Afioga Sulamanaia Fetaiai Tauiliili Tuivasa: E faamalulu atu i lenei taeao ma le faafofogaaga foi a lau Afioga i le Fofoga Fetalai. O le sui usufono lenei o Vaimauga e tumu i le ava, e tumu i le ava le itumalo lenei. Ae na ala ona fai atu sau tala se i tulou le paia o le Maota lenei, o lea lava e saunoa lau Afioga, a o lea e fai lava taugaupu ia i lalo o le faafofogaaga lea. E pei o le agaga lena e avatu ai. Ae afai foi la ua paopapa se leo o le Vaimauga i lenei taeao, ia faamagalo le sui usufono.

E faamalulu atu i lau Afioga i le Fofoga Fetalai aemaise lau Afioga i le Saofaapito, o tulaga o lenei taeao, e leai se isi e le oso i luga se moge. Ona o le a? O lea na tatou tofafa ma maleifua mai i fanuga lelei, e omai e feiloai ma omai e vaai atu i ina i lena itu. A o le a le mea lea ua aumai i lenei taeao? O le fefulituaa'i ma le tulaga e le maua ai so tatou fealofani. O lea na ou faapea lava au i le taeao lenei o le a aumai pe faatuatuai le lafo a le Afioga i le Fofoga Fetalai po o le a foi se tulaga, a o lea ua lafo i le komiti. O le a la le uiga o le faaleleiga? E pei o le agaga lena, ua le maua ai foi se manatu. Ae faamalulu i lau Afioga i le Fofoga Fetalai...

FOFOGA FETALAI: E faamalulu i le sui usufono mamalu...

Tofa Ale Vena Ale (Faleata 4): Lau Afioga i le Fofoga Fetalai, pe maua se avanoa faamolemole.

Afioga Sulamanaia Fetaiai Tauiliili Tuivasa: Faatali se i uma lau tala. E faamalulu atu, o le a le tulaga ua i ai, e usitaia tele e le sui usufono lenei.

FOFOGA FETALAI: Ia faafetai.

Afioga Sulamanaia Fetaiai Tauiliili Tuivasa: E usitaia e le sui usufono lenei ona e ava i lau Afioga. E ui lava e le o fetau, ae o le a faia lava lou finagalo.

Na faatonuina e le Fofoga Fetalai le Satini o le Maota e ave i fafo le sui usufono mo Vaimauga 1 e tusa ai ma le Lafo a le Afioga i le Palemia.

FOFOGA FETALAI: E faamalie atu i lau Afioga, malo faafetai. O tatou e faapena tatou te felagolagomai i mea e mamalu ai le tatou Maota. Ia e le uma le fai aso a le Atua. O le mea lea, e faamalulu atu ai i le sui usufono mamalu...

Tofa Ale Vena Ale: Lau Afioga i le Fofoga Fetalai, pe maua se avanoa lau Afioga?

FOFOGA FETALAI: Talu ai o lea e i ai le tatou mataupu fuafua...

Tofa Ale Vena Ale: E talu ai ona o le mataupu lea i le toesea o le Afioga i le sui usufono o le Vaimauga, e silafia foi o le faafeagai o le Vaimauga ma Faleata, e le o manino.

Ae ou te talosagaina, afai o le finagalo lea o le Maota, pe a se 24 itula e... Ia o le talosaga lena aua o lea e le o manino na ona faatonu lava e ave i fafo, e aveese ma le Maota, ae le i...

FOFOGA FETALAI: O le Tulafono Tumau mo le silafia, e leai mo le aso Fono lenei. E na o le pau lava lenei o le aso Fono. Mo le silafia e le sui usufono mamalu.

Tofa Ale Vena Ale: Ia faafetai i lau Afioga.

FOFOGA FETALAI: O lea ua maua lou finagalo le sui usufono o Faleata 3. O le mataupu lea na tuuina mai, ou te faamalulu atu e i ai vaega o le tatou Tulafono Tumau e tataua ona uia.

E tai pei la o le faatoai mai i le Ofisa o le Fofoga Fetalai ona file lea i ina ma stamp i ina. O lea la e maua, e na o le original na aumai i le Fofoga Fetalai, a o le kopi foi la e ave i le e faasaga i ai, e tataua ona ui mai i le Ofisa o le Fofoga Fetalai, ona stamp lea, ona faatoa oo mai lea o le lipoti ia te au.

O le mea lea e faamalulu atu lau Afioga i le sui usufono mamalu, o le process lena o tulaga faapea... E pei foi o le tulaga lea na oo i ai le mataupu na tuu mai e le sui usufono o Gagaemauga 1. O le mea lea e faamalamalama atu ai faapena. Ne i pea mai, ai o fai nisi tulaga e le Fofoga Fetalai. E leai tatou te ui lava i Tulafono Tumau ma tulaga e i ai, ae oo mai lava i le Maota e le mafai ona le oo mai i le Maota. O le mea lea, o le faamalamalamaina lena o lea mataupu.

Susuga Hon Tuilaepa Fatialofa Auelua Sailele Malielegaoi: Lau Afioga i le Fofoga Fetalai, ia ou te tulai atu ou te faafetai atu, e pei o le ala lea sa taumafai atu ai e fia maua se malamalamaga. O lea la faatoa... e ui ina tautuauega lau faamalamalamaga, ae o lau tuualalo, sei e alofa e faamalamalama lelei mai, ae le o le faatopelau mai o lau faatonuga, e fia malamalama foi matou. Ona o lea matou te matau i le faagasologa maiga o mataupu nei... ae o lea la sa aumai aloaia le mataupu a o...

Afioga Hon Fiamē Naomi Mataafa: O le mea e fia faasao... O le mea e fia faasao lau Afioga i le Fofoga Fetalai.

FOFOGA FETALAI: Ia malie maia lau Afioga i le Taitai o le Itu Agai...

Susuga Hon Tuilaepa Fatialofa Auelua Sailele Malielegaoi: A o lea e le malamalama matou. O le mea la lea ou te faamalulu atu ai foi.

FOFOGA FETALAI: Ia faafetai, ia malo lava le tofa. Lau Afioga i le Tamaitai Palemia.

Afioga Hon Fiamē Naomi Mataafa: Lau Afioga i le Fofoga Fetalai, e leai e lelei lava le faamanino ma faasao o ala o mea. Ona o lea e maua, e faatulai mai le finagalo o le sui usufono o Faleata, o lea foi ua lagolago le Afioga i le Taitai o le Itu Agai, e agai i se mataupu fou. E le o manino le Maota lenei, a o lea ua fai le felafolafoaiga, ma tuuaia ai foi le Nofoa i ala o mea. O lea la ua saunoa le Fofoga Fetalai e faamalamalama.

O lou tulai atu, ona o lea e taatia i le Maota ia lafoga o ni faiga faaituau. Lau Afioga i le Fofoga Fetalai ma le mamalu o le Palemene, o le mea lea e aumai ai a tatou Tulafono Tumau ina ia putiputi ai ala o mea tatou te savavali ai. Atonu o lena ua manino mai le Afioga i le sui usufono o Faleata 3, o le e ou le mataupu fou lea ua aliae mai i lenei taeao. O lea ua saunoa lau Afioga e faagasolo i tulaga masani, tatou o ia i lea. Faafetai.

FOFOGA FETALAI: Ia malo faafetai, e talitonu foi o lea ua manino lea mataupu. O lea foi ua saunoa faamalamalama lau Afioga i le Palemia, ia o tulaga lava lena. O lo o i ai lava ala o mea e ui tatou mataupu faapenei, ma

e faavae lava i le tatou Tulafono Tumau. O le mea lea, ia tatou maua le fefaamagaloa'i i lenei aso. O a foi ni upu ma ni tala, tatou faamoemoe i le Atua e maua ai lo tatou fesoasoani. E leai lava se isi tatou te tua i ai, ua na o le tatou Atua lava tatou te tua i ai, e maua ai le toamalie o le Maota. O le mea lea, tatou faaauau le tatou galuega, ma ia manuteleina le tatou faamoemoe o lenei aso.

**TULAFONO TAU FAAOFI O TEUTEUGA O LE TULAFONO O
SOOTAGA VA LELEI O LEIPA MA GALUEGA 2022
– felafolafoaiga faaauau i luga o le faitauga faalua**

FOFOGA FETALAI: E tolopo le Taulumaga i le aso ananafi o lo o saunoa le sui usufono mo le itumalo palota o Anoamaa 1.

Ia, o le avanoa lenei e faaauau ai le saunoaga a lau Afioga i le sui usufono mamalu.

Afioga MOEFAAUOUO MALAGAITUTOGIAI SEPULONA MOANANU (Anoamaa 1): Lau Afioga i le Fofoga Fetalai, faapea foi le paia i le Maota, ua sola foi lagona o lenei taeao e tusa ai foi ma le tulaga ua aliae mai. Ae faafetai lava ua tatou mua i le Atua i lenei taeao, e ala i le... ua e tofilua le lega faapuafanua e sama ai le sugalu ua taua aua le Atua Soifua ma lo tatou vatapuia. E taua tele ona tatou faatagisia le Agaga Paia o le Atua i taimi uma. Aua o Ia e toafilemu ai so o se mafutaga, so o se aiga, nuu faapea foi Malo. O le matou lava foi matau ma le nofonofo atu i lenei taeao, ua faiva ese foi Lopepe i le amataliaga o le tatou mafutaga ma le tatou Fonotaga. E le toe tele foi se upu a lenei itumalo e toe oooo i le Tulafono, ua leai foi se nanea o se matou faamoemoe.

Talofa ia Samoa ma le matau mai, ioe. O le ala lea o le matou faaoololomaau i le paia o lo tatou Maota, faifaimalu o tatou faiva.

FOFOGA FETALAI: Ou te faamalie atu i le sui usufono mamalu, o lea ua maea ona fai atu le tala a le Nofoa. Ou te talitonu foi o lea ua toamalie le tatou Maota. O le mea lea, ou te talitonu foi o oe o se tasi o sui usufono matua o le Maota. O le tatou galuega e faapena, o lea foi ua faauma atu se tala a le Nofoa, ina ia faatoamalie le tatou Maota. O le mea lea lau Afioga i le sui usufono mamalu, e leai o le agaga lava ia... e moni lava le saunoaga, ae ua e maua mai o lea ua uma ona fai atu le tala a le Nofoa. O lea foi ua uma ona ou oo uma i itu uma, ma tulaga uma, o le agaga lava ia, ia faagasolo le tatou galuega. Ne i avea foi lou tulai mai ma mea e toe lagalaga ai le tatou mataupu. O le mea lea ou te fautua atu ai le sui usufono mamalu, o lea ua maea lea tulaga, ae o lo o i ai le tatou galuega o lo o fai. Ma le agaga faaaloalo le sui usufono mamalu.

Afioga ALAIASA MOEFAAUOUO MALAGAITUTOGIAI SEPULONA MOANANU: O le atunuu lava ia e i ai lava tootoo o le aava e i ai foi tootoo o le manino. Ioe. Ae i ai le talitonuga i lenei taeao, se e amatamea lava le Maota leni i so o se mea. E faitau mea foi le atunuu e faatili le laumea aua le Maota leni. O le ala lea e le mafai ona matou...

Afioga Hon Fiamē Naomi Mataafa: Lau Afioga i le Fofoga Fetalai, o le mea e fia faasao.

FOFOGA FETALAI: Ia tulai mai lau Afioga i le Palemia.

Afioga Hon Fiamē Naomi Mataafa: O le mea lava lea ou te lagona e tatou te felautoai ai, pe a tatou le o i ala o mea o le faagasologa o le tatou galuega. O lena ua saunoa atu lau Afioga i le sui usufono. Ia malie maia lou finagalo, o lea ua faagasolo le tulaga. A o le mea lea ua aumai, o lea ua mananao outou e talanoaina le mataupu lea. E le mafai ona fai, o lea ua ave i le Komiti ina ia lava saausi, e fai o le Komiti, a o ni molimau. E i ai lo tatou taimi, ae malie maia se i faaauau le tatou galuega.

FOFOGA FETALAI: Ia, masalo le sui usufono o lea ua e maua mai le agaga o le Palemia e pei foi ona ou fai atu, o lo o i ai le tatou galuega tuua. E tele lava le tatou taimi i le process lea e faatino. E le faapea ua oo i se taunuuga, e leai e faapena e sau lava malama o le Atua. E faapena, e silasila i le Komiti, silasila i le Palemene, o mea na e aumai i le Atua. O le mea lea o lo o lava ma totoe le tatou fuafuaga ma le faamoemoega o leni mataupu.

O le mea lea, lafo ia o tatou faamoemoe i le Atua e maua ai lo tatou fesoasoani. O le mea lea lau Afioga i le sui usufono, o le tatou Tulafono lea tatou te talanoa ai mo leni taimi. Ma le agaga faaaloalo.

Afioga ALAIASA MOEFAAUOUO MALAGAITUTOGIAI SEPULONA MOANANU: Ua faamalo fetalai, malo saunoa i le Afioga i le Taitai o le Maota le Afioga i le Tamaitai Palemia faapea foi lau Afioga i le Fofoga Fetalai. E pei lava ona ou fai atu i le taimi ua sola, ua sola foi manatu e leaga e malu, o le tai e malu ae vilivili lalo, o le matou lava lea matau, ona o la e tapuai mai lou itumalo. O le ala foi lea ou te tulai atu ai, ua ou pulea lou loto, o a ni ou manatu na tuu e fai i le tatou Tulafono lea e taatia nei i lumamea, o le a faapena ona faapafala se faamoemoe. Ioe.

Lau Afioga i le Fofoga Fetalai, e tagiuu lava le loto i leni taeao, o le ala lea. O le a faavagavaga le taimi mo nisi lauga, a o le lauga a le Anoamaa, Tumua ia Lufilufi, o le agaga lea o lea e tau momoli atu ina ia toamalu le tatou folauga. A o le matou tala, ou te fautuaina foi lau Afioga i le Taitai o le tatou Itu ma le tatou Itu, ia toa le tai. Ia tatou o e fai le tatou atunuu ia manuia o la e tapuai mai Samoa.

Ia, sagai ane laia o lau Afioga ma le paia o le Maota, a o se matou tala lea. Ia alofa mai le Atua i lenei aso, e pei ona tatou amatamea i le Atua, ou te le tio foi leaga so o se mea lava e i ai le Atua, e i ai foi ma le alii o le lalolagi, e sili atu ona taumafai e lepeti le nofo lelei. O le mea la lena, ia vaatele le tofa ia i tatou aua le tapuaiga mau a Samoa.

O le matou tala lea ma le agaga faaaloalo. Lau Afioga i le Fofoga Fetalai, e faamalulu atu foi, o se taumafaiga atu lava ia maua le toafilemu o le tatou Maota. Ia, mata e o masiasi i le tapuaiga a Samoa, tupulaga o lalovaoa aua taeao. O le matou tala lea ma le agaga faaaloalo manuia lenei aso.

FOFOGA FETALAI: Ia malo faafetai, malo tofa malo saunoa Lufilufi, ou te talitonu lava o le ua faafofoga ma le totoa le paia o le Maota, aemaise foi o le faafofogaaga a le atunuu. O le mea lea, malo faafetai, faafetai foi le fesoasoani mai ina ia maua pea le toafilemu ma le toamalie o le tatou Maota e faagasolo ai pea tatou galuega. Ia faafetai mo lou sao i lenei taeao, malo faafetai.

O le avanoa lenei o se tasi o sui usufono. O lea e matau atu ua fou mai le sa o Faleata 4, lau Tofa i le Matua Ale.

Tofa ALE VENA ALE: Lau Afioga i le Fofoga Fetalai, faafetai mo le avanoa o lenei usugafono, ua mafai ona maua se avanoa e faaalua ai se manatu e tusa ai o le tatou Tulafono ua i lumamea nei o le Maota.

O le viiga o le Atua e le mafai ona faaitiitia i lenei taeao manuia. Ma ua tatou i ai faatasi ma lau Afioga i le Fofoga Fetalai i luma o le Atua i lenei taeao, i le faamanuina o Lona Suafa Paia, le faaneeneina o le mamalu ma le matagofie o le Atua. O le Atua o lo o faavae ai Samoa ma lo tatou Malo tauatiae. O le Atua o le amiotonu, o le alofa mutimutivale, ma o le Atua tatou te toomaga i ai i o tatou faamoemoega uma.

Lau Afioga i le Fofoga Fetalai, ia foi atu ia le viiga ma le faaneetaga ma le mamalu atoatoa i le Nofolagi o le tatou Matai Sili i le lagi. O le Atua o lo o afio i le mea nei, o lo o tautoaluaina i tatou i o tatou manatu ma o tatou lagona, ma lo tatou valaauliaina e avea ma sui usufono o lenei Palemene, aua Samoa ma le tauatiaeina o lo tatou Malo, ina ia manuia.

Ou te ofo alofa atu i lau Afioga i le Fofoga Fetalai i lenei taeao, ou te momoli atu le agaga faamalo, malo le pale, malo le faatoatoa, malo foi le onosai. E faafetai foi i lau Afioga a e le faigofie lau galuega o le faafofoeina o le maemae foi o sui usufono mamalu o lenei Paeaiga lona XVII o le Malo o Samoa i lenei vaitaimi. Ia manuia tele ou faiva alofilima aua le faafeagai ai ma le galuega.

Ou te ofo alofa atu foi i lau Afioga i le Palemia, Afioga i Minisita o le Kapeneta, Afioga i Minisita Lagolago faapea foi le matagofie o le tatou faigamalo. E faapena foi lenei Itu o le vai i le Taitai ma le Sui Taitai, ma sui

usufono mamalu uma o lenei Palemene. O le tapuaiga foi a Ofisa Sili o Pulega o Matagaluega malo lava faafetai.

Ou te faatulou atu foi i le paia o le tapuaiga i Lana Afioga i Le Ao Mamalu o le tatou Malo ma le Masiofo, Sui o le Fono o Sui Tofia, lau Afioga i le Faamasino Sili ma lou faletua, e faapea foi le Afioga i le Peresetene, alii ma tamaitai o le Faamasinoga o Soligatulafono ma le Faamasinoga o Fanua ma Suafa.

E faapea foi le paia o le tapuaiga a lo tatou atunuu, aua Aiga o Tupu ma Aiga o Nofo, Aiga o Ee ma Aiga o Papa ma Aiga na Tafaifa. Ae a le usoga a Tumua ma Pule, Ituau ma Alataua, Aiga i le Tai ma le Vaa o Fonoti, o paia na o le tatou atunuu.

E le faagaloina foi le faigamalo a tatou uso i Sasae, le Afioga i le Kovana Sili ma le Lutena Kovana faapea foi le paia o le faigamalo a Tutuila ma Manua. O le paia lava lea aua Sua ma le Vaifanua, Fofoga ma Aitulagi, Saole ma Saleaamua ma le Launiu na Saelua. E faapea foi le Faatui o le Auvaa Tootoo ma le paia o le Manuatele.

Ae matua le tuu i le paia o le afaigaluega tofifi a le Atua, le tapuaiga a le aufaitatalo o lo o faanonomanu i le Atua ma tapuaia faiva o lenei Palemene, aua se manuia o Samoa ma lona lumanai i ona upufai o Malo.

Lau Afioga i le Fofoga Fetalai, le tapuaiga a si ou itumalo, ia tapuai maia ma le manuia. E faauma atu le tatou mataupu i le lauga a Faleata i le Tulafono i le mataupu lea sa talanoaina i le tatou Fono i le Aso Gafua i le tusi a le Minisita i le tofiga o tatou Komiti Faatonu o le tatou itumalo.

Lau Afioga i le Fofoga Fetalai, o le tulaga i le Tulafono e pei ona lumamea nei o le Maota, ia faafetai i lau Afioga i le Minisita, e tusa ai o le Tulafono. Ma ua i ai a tatou Tulafono autu, peitai o le tulafono lenei ua lumamea nei i le Maota, o le toe teuteuina o le Tulafono Autu, i nisi o mataupu ua manatu le faigamalo aemaise o lau Afioga i le Minisita, e ao ona toe faatulaga ai le lelei au i luma o le faagasologa o galuega, le va lelei, aemaise o le afaigaluega i le Public Sector.

O le itu muamua ou te fia tautala i ai lau Afioga i le Minisita, ona o le ua ou matauina i le Tulafono, o le a le tuuina atu i Le Ao o le Malo. Ou te fautuaina lau Afioga i le Minisita, o tatou Tulafono uma lava e pasia e le Maota lenei, e tataua ona i ai le sainia i le aao o Le Ao o le Malo, and then that becomes law, ona avea lea ma Tulafono, a o lau Afioga e faamamaluina ma e atofaina le aso e amata ai ona faamamalu e le Maota lenei. O lau fautuaga i lau Afioga, aua e foliga mai a le oo i Le Ao o le Malo e saini ai Le Ao o le Malo, o lona uiga e foliga mai i le process foi lea ua i ai nei, a le saini Le Ao o le Malo foi mai i le Kapeneta lua vaiaso pasi.

FOFOGA FETALAI: Ou te fesoasoani atu i le sui usufono, e pei lava, e le o le tulaga lena e oo... o le mea lena o le aotelega pe a pasi le Tulafono. E pei lava o se vaega o le Tulafono.... Lau Afioga i le Minisita po o le sao,

ne i te i ua taitaiseseina le Maota ma le faafofoga mai o le atunuu i le tulaga lea... ma le faaaloalo lau Afioga i le Minisita.

Tofa Hon Leatinuu Wayne Soialo: E faafetai atu lava i lau Afioga, e leai e musu lava e fia faalavelave ae tuu pea se i aumai le finagalo ona faasao atu lea i le taimi e fai ai le tali, leaga e tele ai foi le fetoi ae...

Tofa ALE VENA ALE: Ia faafetai i lau Afioga, se i maua ia le taimi e tali mai ai pe a maea, o le a taumafai e tali atu pea.

FOFOGA FETALAI: Ia saunoa lau Afioga i le sui usufono mamalu.

Tofa ALE VENA ALE: Lau Afioga i le Fofoga Fetalai, o le faatulafonoina o le 13 tausaga e faafaigaluegaina. Lau Afioga i le Minisita, ou te popole tele i le tulaga lea o le faafaigaluegaina o tamaiti tai 13 tausaga. O le atugaluga ia te au, o le taimi tonu lea e tatau ona uunaia ai alo ma fanau a lo tatou atunuu i aoaoga, aemaise ai o le a feteenai le faatulafonoina o le faafaigaluega o le 13 tausaga, ma le tautua lea o lo o fai e alo ma fanau i le tatou atunuu, i matua ma aiga. O lona uiga e i ai le taimi lau Afioga i le Minisita o le a fai atu i le tamaitiiti foi lea e alu e valu mai le popo e fai ai le faalifu, ae fai mai seiloga e tologi. Ou te le fautuaina le faatulafonoina o le faigaluega o tamaiti e 13 tausaga lau Afioga, e manino lava lau mataupu. Ae lafo atu pea i lau Afioga ma le Tulafono. Afai lava e te silafia... ma le isi mea, e toatele fanau a le atunuu e tino ese, e na o le 13 tausaga ae vaai i ai o le tamaitiiti 24, 25, 26, ia o le a faaoga foi e le vaega lea e fai a latou galuega mamafa e feteenai foi i taimi e... ae lafo atu pea i lau Afioga i le Minisita e ou le Tulafono.

O lau vaai atu i le faatulagaina mai i le Tulafono lau Afioga, o lea e i ai maternity leave, ae po o le a sou finagalo, o lena foi e i ai i le Tulafono a le Public Service e i ai foi paternity leave o tama. Aua a oo i le taimi e maitaga ai le tina, ona livi lea o le tama foi e fesoasoani seia malosoi foi le tina ona faapena lea ona toe foi i le galuega. E tatau lava ona i ai se paternity leave pei foi ona faatulaga mai e le Public Service Act mo le public sector lau Afioga, ma le faaaloalo lava.

Ia, ona ou oo mai lea i ovataimi ma le faafaigaluegaina o tatou tagata. Lau Afioga i le Minisita, ia o le tele lava o nei Tulafono e tuuina mai i le Maota nei, o le faaleleia lava o tulaga i le faafaigaluegaina o tagata, aemaise le va feagai ai o galuega, aemaise foi le faamutaina o galuega i konekarate ma mea faapena. Ia o lea ua matauina foi le toe teuteuina o le Tulafono, ou te manatu o se agaga lelei lea ua aumai e lau Afioga i le Minisita.

Ona ou manatu ai lea o le a i ai nisi mataupu e fia laga pe a oo i le taimi e auiliili ai le tatou Tulafono. Ae momoli atu le agaga faafetai i lau Afioga i le Minisita e tusa ai foi o lena Tulafono. Malo foi faafetai.

A o le tapuaiga a le tatou itumalo, ia o lea ua uma ona faatofal'ai le tatou itumalo i le aso Gafua i le fonotaga a le tatou itumalo i le tusi lea na avatu e le Minisita. Ou te iloa a faalogo i ai le Minisita e matua meia lava i lafoga a le tatou itumalo. E ui o lea, tatou tuli i luma le sau o le ae...

FOFOGA FETALAI: Ia, malie le sui usufono mamalu se i tulai mai le Afioga i le Minisita leaga o lea ua taua i lau saunoaga. Saunoa mai lau Afioga i le Minisita mo Tina ma Tamaitai, Atinae o Nu'u ma Afioga ma Agafesootai.

Afioga Hon LEOTA LAKI LAMOSITELE (Minisita mo Tina ma Tamaitai, Atinae o Nu'u ma Afioga ma Agafesootai): Lau Afioga i le Fofoga Fetalai, leai, e tatalo atu lava i le uso a sui usufono e le o aiga le mataupu lea o lo'o saunoa mai ai ma le tatou Tulafono lea o lo'o talanoaina. O le talosaga atu lava ina ia tatau pea lau saunoaga i le tatou Tulafono lea o lo'o talanoaina. Ma le faaaloalo.

FOFOGA FETALAI: Ia, ua maua mai e lau Afioga i le sui usufono mamalu.

Tofa ALE VENA ALE: Lau Afioga i le Fofoga Fetalai, faafetai. O lau faamatalaga lea e avatu i le Maota, leaga o la e faafogafoga mai lou itumalo. O lea ua ou fai atu i lou itumalo e ala atu i le Palemene lenei, o lea ua uma ona fai le tatou Fonotaga e tusa ai o le tusi a le Minisita. Ioe. O la e foi ua i ai le finagalo o le itumalo. Ma e le i i ai se sui aloaia o le FAST i totonu o le itumalo lenei. O la e foi ua uma ona oo atu le sa tauva ma faamalulu atu i le itumalo, a o lea ua uma ia mea, e leai se mea o le a pisapisa ai i ia mea, tuu mai pea le Komiti ia a Faleata 4, ma e le taalo se isi i le itumalo lenei. Ia manuia le tatou Fono.

FOFOGA FETALAI: Ia, malo saunoa. Faafetai. O oe foi o se tasi o sui usufono matua o le Maota, ia malo mo lou sao i le tatou Tulafono, aemaise foi o lea ua faailoa mai foi ma le Komiti. O le mea sili lava ona taua, o lea ua talia lelei e lau Afioga ma le itumalo le tusi a le Minisita lena na avatu aua le agai i luma o le tatou faamoemoe. Malo faafetai saunoa.

Ia, o le taimi lenei o se tasi o sui usufono. Ia ua ou vaai atu ua fou mai le sa o le sui usufono matua i Aana Alofi 2, lau Afioga Aiono Tile Gafa. Ma le faaaloalo.

Afioga AIONO TILE GAFA (Aana Alofi 2): E momoli atu le agaga faafetai i lau Afioga i le Fofoga Fetalai mo le avanoa taua ua tuuina mai i lenei usugafono. E fiu e tau nana le tamai moa e ioio lava, tulou lou gutu ma le afi vaeatu le Maota. E fagufagu mai pea i le loto ma le agaga lau saunoaga

amata o lenei Fono ina ua e tatalo i le Atua e faafetaia Lona agalelei ma Lona alofa. Ioe. Le Atua ua tapule i lo outou soifua ma topule i lo tatou ola lea ua afua ai lenei taeao matagofie, i le afai o le atunuu o Samoa i ona feau ma galuega. E faapena se lagona e avatu le agaga faafetai.

E lagona le agaga faafetai i saunoaga, aua tatou te fai lava i sasae ma sisifo, o fea lava tatou te agai i ai, o lo o i aao o le Atua mea uma o lo outou soifua ma lo tatou ola. Ioe. O Ia na te tapasaina a tatou feau ma tatou galuega. O a foi outou finagalo ma o tatou loto i mea tatou te loto i ai, ia soia ia, aua ia ne i o tatou faasili so tatou manatu, ma ia tatou talitonu i le alofa o le Atua, e leai lava se isi o tatou e atoatoa, a o Lona malosi ma Lona fesoasoani mai e manuia ai faiya ma tiute. E momoli atu le faafetai i lau Afioga malo le tofa, faafetai i le Taitaifono le faatoatoa o lau Afioga i le Fofoga Fetalai, e le faigofie le galuega. E talitonu foi o lo o au le Atua ma lau Afioga. O paia o le aso e le toe oo tele i ai sou leo, o la e foi e faafofoga mai si ou itumalo o Aana Alofi 2. O paia o Samoa o paia lava mai le vavau e oo lava i le faavavau, o le atunuu tofi ua taoto a o se i'a mai le moana.

E faatulou atu ai i le paia o le Maota i lau Afioga i le Fofoga Fetalai aemaise le Afioga i le Tamaitai Palemia, le mamalu foi o le Kapeneta ma sui usufono mamalu o lona Itu, Minisita ma Minisita Lagolago. Ae faapea foi le paia o lenei Itu i le Afioga i le Taitai o le Itu Agai ma le Sui Taitai ma sui usufono aemaise foi le paia o le tatou mafutaga i lenei taeao i lau Afioga i le Failautusi o le Fono ma le Ofisa.

E le toe tele foi se lagona, e le toe tele foi se manatu. Na pau lava o lea e i ai lava nai vaega e fia lagolagosua ai ma fia avatu ai se fautuaga aua saunoaga matagofie a le paia o le Maota ua taoto nei i lumamea e tusa ai ma lenei Tulafono. Ia malo faafetai. Faafetai i lau Afioga i le Minisita na tapenaina ma ou le Tulafono ua faatulai mai, o lenei Tulafono matagofie. Ia e leai lava se isi lagona, o le agaga lea, o le matau atu o le silasila mamao ma le vaai aua le manuia lautele o nai o tatou tagata faigaluega foi i atinae ma tulaga o pisinisi, aua le atiaaina o si o tatou atunuu aemaise foi o nai o tatou aiga. E leai lava se isi ogatotonu o mea uma, o le tupe lava. E faigaluega o le tupe, e galulue o le tupe, ioe. A o lea, faafetai i le faatulagaga o lea ua aumai e toe fesui ai nisi o vaega, ia atonu e le o se fesuiaiga agai i tua a o le fesuiaiga agai i luma. O le mea lea e momoli atu ai le agaga faafetai i lau Afioga i le Minisita.

Ae pau lava le vaega e fia oo i ai se matou faamatalaga, o le tulaga lava lea o tatou galuega foi lea faavaitaimi. O le mea moni lava ia lau Afioga i le Fofoga Fetalai, ua faalogologo lava ma le totoa i le tele o le matagofie o le sosia o le tofa ma finagalo faaalua o lenei mataupu. Ae faapena foi ona lagolago atu. Ioe. O le vaitaimi lenei o lo o afatia le tatou folauga ona o faamai, e talitonu e leai lava se isi mea sili ona manaomia e nai o tatou aiga, o seleni. O le faamoemoega lea o le tele o aiga lea ua i ai, sa i le vaitaimi lea faatoa tulai mai le malosi o le Koviti-19, vaitaimi o le aso maluu ma tulaga

faapena a o sauni, sa ou tu ai i le laina, tu ai i le laina i le Western Union e tala foi si au tupe mai fanau. O le uiga o lau tala, e i ai si loomatua sa i ou luma, ioe, e tu lava i le laina, a o le laina ou te iloa e laitiiti le malae lea i luma i le taamilosaga a le malae, ae le i taina le 8 i le taeao e le i tatala, ioe. E tasi lena tulaga ou te iloa ua vave ai le pepesi o le faamai, ioe, o tupe ia mai fafo ma laina uumi ia sa tutu ai le atunuu. Ou faalogo atu i luma i le tina lea, fai le telefoni, tu lava i le laina, talanoa i si ana tama, ua faasoa mai Niu Sila le seleni. Fai mai le tala a le loomatua, pau o le upu na ou faalogo atu ai, o lena ua uma, o lena ua uma le tupe. Ioe. Ae ou faalogo atu, ou te le iloa la po o le a le tala a lana tama, ae na pau o le upu na ou faalogo atu i ai, ia, faafetai, ou te toe usu mai foi la taeao. Ioe. E ese le manaia, e ese le manaia. O le lagona fiafia, faamoemoe i fafo i fanau o e galulue e fesoasoani mai.

E lua ou faalavelave talu ai, ioe. O molimau ou te talanoa atu ai ona o le tulaga lea, e le i leva lea. O lou aiga, e tele lava ina limavaivai, a o la e o i fafo e galulue. O le mea e masani ai, e fiu e tauvalaau e omai e fai le saofaga o le faalavelave, ioe. Ae a le taimi lenei? O fanau lea e i fafo, tasi lava le tala, o le taimi, ta le taimi ua leva ona saofafai. E le fesiligia le saofaga e avatu, omai ma le fiafia. Ua lava lena lau afioga, lau susuga? Ia fai ia lelei. Ioe. E ese le manaia, fai fiafia, fai aua ua lava le faasoa. Ioe. O le matou falesa, o le tele o aso sa e seasea lolotu i vaitaimi ia, aisea? E leai se tupe e fai ai le lotu, le sau le tama, tuli mai na o tamaiti. Ae a le vaitaimi lenei? Leai se mea e misi o le soifua tautua i le Ekalesia, ioe. Fai mea uma. Mai fea? O le agalelei mai o tatou fanau la e o e faigaluega ma o e tau le fualaau ma lafo mai tupe. O molimau na ou te talanoa atu, ioe, o le aoga. O lea ua maua ua saunoa nisi ma Afioga foi i... o lo o i ai faafitauli o lo o tau fofo, o lo o i ai faafitauli o lo o tutupu i fafo. Afai ua 8,000 le numera o tatou tagata i fafo ae fai e se toalima po o se toafa se mea e tauleagaina ai, ioe, se o le faafitauli e mafai ona fofo. O le faafitauli e mafai ona foia, fofo le faafitauli, ona o le a? O tua atu e vaai i le lautele o le atunuu, vaai i le manuia, ioe. E le aveane le lagomate e tasi e aafia ai le manuia o le atunuu i lenei vaitaimi i le fesoasoani mai. Ioe. O le agaga lena lau Afioga i le Fofoga Fetalai, o le faafitauli, o tatou o le soifuaga ma le olaga, o le olaga o faafitauli tatou te feagai pea, e luitau lo outou soifua ma lo tatou ola, ae a? Ae a tatou le mafaia loa ona fofo le faafitauli, o le a la le aoga? O le a le aoga? Aumai tatou e le Atua e feagai ma faafitauli e sue lou faatuatua ma lo tatou talitonu ia te Ia, faamoemoe e leai se mea e faigata i le Atua. Ioe. O le agaga lena lau Afioga, ae vaai i le manuia o le lautele o le atunuu, vaai i ai. E mafai lava ona fofo lau Afioga i le Minisita. Aua ne i o tatou faiaina i mea faigofie, tofofi tatou e le Atua i feau ma galuega, tatou tapena ma sauni ma faatuatua i le Atua e leai se mea e faigata i le Atua.

Avea ia lenei avanoa ou te tulai atu lau Afioga i le Fofoga Fetalai, e faamalulu atu pe a salaese sau upu, sa ou matamata anapo i le Afioga i le Minisita o le Soifua Maloloina, ioe, i le taliaina o meaalofa ma fesoasoani

mai atunuu i fafo. O le a le uiga o lea mea na oo mai i lou loto? Saili le fofu o le faafitauli, le feagai o le tatou atunuu ma le faamai. Ioe. Lea na ou vaai i ai anapo. Na o lou faafetai i lau Afioga i le Minisita o le Soifua Maloloina. Ioe. E fesoasoani lava le Atua i le taumafaiga vaivai a le tagata e faatuatua. O le soifuaga lena. E oo foi i tagata faigaluega e pei ona ou fai atu, sa ou vaai ananei i le taeao i le faasalalauga i luga o upegatafailagi i se tasi o tina e 42 aso o toesea mai lona aiga, e nofomau i le falemai e fai le galuega, o le nurse, e tautua aua tagata ua aafia i le faamai, a o la e tu mai ma lana ato faatoa alu lea i lona aiga e vaai si ona toalua ma si ana fanau e toalua. O le faamatalaga lena o la e sau ai. Ioe. O lea ua maua finagalo faaalua, i nisi o faamanuiaga, nisi o fesoasoani mo tagata, ioe. O tulaga lautele, ou te talanoa ma le faaalalo, silasila i ai lau Afioga i le Minisita e ou le Tulafono. Ioe. E le faigofie, e le faigofie le tatou atunuu o lo o tautua i le ao ma le po, aua le taumafaiga e lagolagosua i si o tatou atunuu, o si o tatou atunuu e le toatele. A 200,000 fua i atunuu tetele o le lalolagi ma tulaga o lo o i ai, e tataua lava ona tatou silasila mamao ma silasila totoa, ioe.

O lea e avatu ai le fautuaga ma le tuualalo aua se fesoasoani mo nai o tatou tagata ia. Faafetai lava i le Afioga i le Minisita o le Soifua Maloloina o lea sa saunoa ananafi o la ua uma ona tapena le pepa. Ia talosia. Faafetai le faatoatoa ma le silasila mamao aua le aufaigaluega.

Lau Afioga i le Minisita o Pisinisi, Alamanuia ma Leipa, o le isi vaega lea ou te fia fesoasoani atu ai, pei foi ona saunoa nisi o sui usufono, o le tulaga lea o alo ma fanau e faafaigaluegaina. E 18 tausaga ou te iloa e talafeagai, a o le tausaga lava lea ua aumai o le 13 tausaga, lau Afioga ou te tatalo atu lenei itumalo, tailo lava i ai, tailo lava i ai, a o se tulaga e fai ma faafitauli i totonu po o fea e faigaluega ai. E fai ma faafitauli aemaise o le tagata e ona le galuega. O le a faapefea ona faafaigaluega, o a galuega o le a tuu i ai, o a mea e fai? Ia, ne i te i ua... i se taimi ona e saunoa faamalamalama atili, ae pei o le tulaga lena. A oo ina masani le vaai i tupe o le ituaiga age lea, le ituaiga tausaga lea. Ae a faapefea la pe a leai nei la se tupe le toe faigaluega? O le a le mea e maua? A o le fai o le le alu i le aoga, e oo mai ai nisi faigata ma nisi faafitauli. Ioe. E fai o le va o le tamaitiiti ma le tagata faigaluega, a o le va foi o le tamaitiiti lea 13 tausaga ma ona matua. E i ai lava faafitauli e tutupu mai ai. E leai loa se tupe, pepelo i matua, alu gaioi, ia, o le ituaiga mea lena. E tupu ae, e tupu ae e aveia ma tagata matua, ua masani i uiga ia, ioe, ua le fefe e fai le... O le tulaga lena lau Afioga i le Fofoga Fetalai. Lau Afioga i le Minisita, o upu a le atunuu, e le sua se lolo i se popo e tasi. O a foi faiva e sii, ia, e leai se faiva e atoatoa. O sa matou tala e faapena.

A o le tuualalo ma le taumafai atu, afai e tau ane ai lou finagalo, ia viia le Atua. A o le matou tatalo, ia fesoasoani mai le Atua i lau Afioga i le Minisita, aemaise lau Afioga i le Ofisa Sili o Pulega ma le Matagaluega, aua le tatou Tulafono ina ia tapue atili ma faaatoatoa nisi vaega. O le tele o nisi vaega e pei ona ou fai atu lau Afioga i le Fofoga Fetalai, ia o lea lava ua oooo

saunoaga a le paia o le Maota. Ia tatou faapena ona tatou veloaso faatasi, avatu aumai aua ni lagona ma ni manatu aua le tatou faamoemoe ma le tatou agai i luma o le galuega aua Samoa ma se manuia.

Ia, ona foi mai lea o se matou leo lau Afioga i le Fofoga Fetalai, faafetai. Faafetai foi i le tapuaiga a si ou itumalo o lo o faafofoga mai i lenei taimi. Malo tapuai, faafetai le galulue. Ua sauni foi le paia o le latou itupa paia aua le latou aso i le aso Sa. Tina, ia faamanuia le Atua ia te outou, mai lava i faletua o faafeagaiga seia oo lava i tina ma matutua. Ia faamanuia le Atua ia maua lo outou soifua laulelei maua le malosi aua feau ma galuega e tautua ai le tatou nuu ma aiga ma le galuega a le Atua. Ia manuia tele lo outou aso Sa. Faafetai i lau Afioga, soifua ma ia manuia.

FOFOGA FETALAI: Ua faamalo saunoa, ua malele foi lau Afioga i le sui usufono mamalu mai Aana Alofi 2. Ou te talitonu foi o lea ua maua lelei e le Afioga i le Minisita lou sao aemaise lava le taua foi o nei Tulafono, aemaise galuega faavaitaimi o lo o galulue ai alo ma fanau a le atunuu. Malo faafetai, o lea lava ua maua lelei lou agaga, aua lava le manuia auiluma o tatou aiga, aemaise foi o le tatou atunuu. O le mea lea, malo faafetai mo lou sao, malo le faasoa, faafetai foi mo le tofa.

Ia, o le avanoa leni o se tasi o sui usufono o le tatou Maota. Ia, o lea ua matau atu o lea ua tulai mai le sui usufono mo Siumu, ia, Honourable Tuuu Anasii Leota. O lou taimi leni lau Afioga i le sui usufono mamalu.

Tofa Hon TUUU ANASII LEOTA (Siumu): Faafetai mo lou avanoa lau Afioga i le Fofoga Fetalai. Ua ou vaavaai atu ua lata le taimi o le tatou malologa, ia e fetai lava e le umi foi se faamatalaga.

E faatalofa atu i lau Afioga i le Fofoga Fetalai, lau Afioga i le Tamaitai Palemia aemaise le mamalu o le Kapeneta, o Minisita Lagolago faapena foi le Taitai o leni Vaega ma le Sui Taitai, sui usufono mamalu o le Palemene ua tatou usufono faatasi i leni taeao.

E faatalofa atu foi i le tapuaiga a Samoa, i Lana Afioga Mamalu Le Ao o le Malo ma le Masiofo, le Sui o le Fono a Sui Tofia ma le faletua ma le paia o Samoa i tupu ma ee, o tamalii ma failauga. Le usoga a Tumua ma Pule, Itua ma Alataua, Aiga i le Tai ma le Vaa o Fonoti, aemaise o le aufaigaluega paia a le Atua o feoi le Talalelei o lo o tauasuina le ipu o le ola aua se manuia o Samoa ma lana faigamalo.

Faafetai i lau Afioga i le Fofoga Fetalai. E tulai atu lava ma le ava, e faatulou foi i le faafofoga mai a Samoa. Sa leai se manatu e fai se manatu i le Tulafono, peitai ua tau asugia foi mata tulou, i le taeao ona o le aso. O le upu a le atunuu, a leai se afi, e le o iloa o fai se galuega. Ae muamua lava ona ou faataoto atu sina vaega lea mo le tatou taeao lau Afioga i le Fofoga Fetalai, o le mavaega a Tofaeono ma Leasapai, a lualuta le gataifale, sisi le

lafala, ae tiu le laafa. A lualuta le gataifale, sisi le lafala ae tiu le laafa. A fisaga le matagi, sisi le laafa ae tiu le lafala.

E momoli atu le faamalo ma le faafetai i lau Afioga i le Fofoga Fetalai, faafetai faamalo. E le faigofie le galuega o faafeagai ma lau Afioga i le tau faafoeina o le tatou Palemene. Faamalo. O le tatalo lava ia maua pea le tofa, faamalo i le tofamamao ma le faautautaga potu e tauave ai le maota ma le Palemene o Samoa. O le agaga lena e avatu ai le tuualalo i lau Afioga, faamalo, faamalo le onosai, faafetai. O la e faafofoga mai Samoa, ia, o le tatou galuega na tatou omai ai i le Palemene lena, tatou te galulue mo le manuia o Samoa, Samoa atoa. O a ni o tatou agaga faaituau, faataoto, tatou vaavaai i le manuia o Samoa lautele.

O lea la ou te momoli atu ai le faamalo ma le faafetai i lau Afioga i le Minisita e ona le Tulafono lena, o lea ua taoto finagalo o sui usufono mamalu o le Palemene, ua manino foi ma malamalama mea uma lava ia sa i ai foi se manatu e fai ai se manatu i le Tulafono.

Na pau lava le vaega o lea ou te toe fia mamafa atu pea i le Tulafono lea o le tatou tagata ia e malaga i fafo, e leai se isi e tio, e aoga ia o le tupe lea e maua mai. E tele aiga ua manuia, leai ma se isi e le o molimauina le atinae o le tele o aiga i seleni ia o lo o maua mai, e pei foi ona saunoa le tele o sui usufono, ua tatou molimauina le manuia, ae ou te lagolagoina le Tulafono e pei ona taoto mai. Na pau lava o lea, e i ai vaega lelei. O le lelei ia o nei galuega faavaitaimi ia o lo o fai, e taua le avatu o alo ma fanau ia galulue mai ia fesoasoani mai i le atinae o Samoa ma o tatou aiga. Ae i ai foi la ona uiga e ogaoga ia ua aliali mai, pei ona matauina vaega ia o lo o tulai mai ai aemaise lava o vaega ia o tamaitai e tutupu mai ai feeseeseaiga i aiga, ulugalii ma fanau, aemaise foi o le masaa atu o le atamai, o le brain drain lea, e i ai tagata e atamamai, a o le naunau lava e fia maua le seleni vave ma le tele.

Ia o vaega ia lau Afioga i le Minisita ma le Matagaluega ia tagatagai ane i vaega uma ia ia matua faataoto lelei ina ia punitia ai ni vaega e afaina ai le tatou atunuu, aua o lea o le a masaa uma atu le malosi lena, o le a leai foi nisi e galulueina aiga ma faatoaga, faigafaiva ma mea uma foi faapena o lo o maua ai le atinae o le tatou atunuu. E pei o le vaega lea lau Afioga i le Minisita, malo faafetai. O lea foi ua vave aumai i luma, vave ona tapena, tatou agai ai ia vave ona manuia Samoa.

Lau Afioga i le Fofoga Fetalai, faafetai mo le avanoa. Na pau ia o nai mea ua ou tulai atu ai e avatu ai se finagalo ma se manatu o lena itumalo. Ia manuia lau Afioga, ia manuia le Palemene o Samoa. Manuia le tapuaiga a Samoa. Faafetai.

FOFOGA FETALAI: Malo saunoa. Faafetai i le sui usufono mamalu o se tasi foi o sui usufono matua o le Maota mai le itumalo o Siumu. Faafetai mo lou sao, manaia le faasoa, ia ou te talitonu foi o lea ua maua lelei e le

Afioga i le Minisita lou finagalo. O le mea lea, faafetai fesoasoani mai i le tatou Tulafono o lo o taumafai e tapue aua lava le manuia o le atunuu. O le mea lea, malo saunoa.

Ia, talu ai o lea ua tatou taunuu tonu lava i le taimi o le tatou malologa o le taeao, ia, ua i ai nisi sui usufono e faaauau a tatou saunoaga pe a tatou taliu mai le tatou malologa.

O le mea lea, faataatiaese Galuega a le Fono Aoa mo lana malologa masani o le taeao.

Na faataatiaese Taulumaga a le Fono Aoa Faitulafono mo lana malologa masani i le itula e 10:45 i le taeao ma toe faaauau i le itula e 11:28 i le taeao.

FOFOGA FETALAI: Ou te faasilasila atu ua toe amatalia nei Taulumaga a le Fono Aoa Faitulafono.

Faamalo onosai i le tatou Maota i le toe taliu mai ai o le tatou malologa, ua matu i fau le taligasua i le paia o le Palemene. E i ai foi le manatu ua maua se faasiligamalosi e faaauau ai le tatou galuega.

E faataatiaese tatou Taulumaga mo le malologa ua maea saunoaga a le sui usufono mo le itumalo palota o Siumu. Ia ma o le avanoa leni mo se isi sui usufono e fia saunoa.

E matau atu o lea ua fou mai le sa o le sui usufono mamalu mai Sagaga 2, le Susuga ia Maulolo Tavita Amosa. Ia o lou avanoa leni ma le faaaloalo.

Susuga MAULOLO TAVITA AMOSA (Sagaga 2): Ua maea ona paleauau le taliga o le sua, pei o le upu i Siumoo ma Vaioa, ua maua foi se faaopoopoga teisi o le malosi, faafetai tele i lau Afioga i le Fofoga Fetalai ma le Matagaluega mo lea foi fuafuaga lelei.

Ua tele pea upu i le alofa ma le agalelei o le Atua i leni aso, e le taumate ona o lea na muai taia le tavai o le agaga o le filemu e le Atua e lau Afioga i le Fofoga Fetalai, ma e avea foi lena e fai ma too o lea ua e sula ai paia ma mamalu o Samoa i ona tulaga faaleaganuu e fai ma tulaga tatou te toomaga i ai i aso e tau toutou ai foi le agi a le matagi. Ia lea la ua fisaga malu foi ma ua see i le lafala le folauga o le tatou sa i leni ituaso, ua maea foi ona paelago uma paia i saunoaga a sui usufono ua mavae aemaise lau Afioga i le Nofoa. Ona manatu lea o le a ou le toe asa lea ogasami, ae o le a agai tonu loa i le tatou mataupu.

Lau Afioga i le Fofoga Fetalai, ia e momoli atu le faafetai tele i le Afioga i le Minisita, le Ofisa Sili foi o Pulega ma le Matagaluega mo leni galuega tele ua folasia ma ua tele foi manatu ma taofi ua tulai mai ai. E le toe tele foi

sau faaopoopoga o lea ua paia uma i ai le tele o sui usufono mamalu ua maea ona saunoa. Pe tolu lava nai mea laiti ia ou te fia agai i ai.

Lau Afioga i le Fofoga Fetalai, o se tuualalo i le tausaga lea e amata ai ona faigaluega i le 13 tausaga. E le popole tele lou taofi i le tulaga o le malosi, aua o le taimi lava ia ua masani foi a tatou fanau i le fai o le tautua ma mea faapena. Ae pei o le mea lea e tau atumatagi ai se lagona, pe faamata i le 13 tausaga ua lava tapena le mafaufau o le fanau, i lea suiga o le a i ai lona ola, o le a see ese mai lalo o tulaga sa masani i galuega e fai a le aiga i lalo o le vaavaaiga a matua ma le aiga. O lea o le a see atu e ese foi lea siosiomaga lea o le a galue ai o ia ma maua ai se seleni. Pe faamata ua lava tapena le malosi o lona mafaufau e faia ai ni faaiuga i mea o le a tulai mai i totonu o le mea o le a galue ai o ia. Aua o le tele lava o a tatou fanau, ia o lona e silafia ma tatou iloa o le vaitau lea agai i le 13 i le 14 tausaga e tele lava ina na o le faalogo ma alu i le faatonuga, e taaiga gofie foi i uiga o isi. O lea la o le a see ese mai ma agai atu i le siosiomaga fou lea e faigaluega ai, faamata o a ni mea o le a fetai ai ma ia? O faamaumauga mai le Ofisa o Faamasinoga o Tupulaga Talavou i le 2018 i le 2019, tusa e 170 le tupulaga talavou na oo atu i luma o le Faamasinoga ona o le solitulafono o le limatagovale, o le ona, amio le taupulea. O le uiga lona o le faamatalaga, pe faamata e le o le vave tuu atu o tatou fanau i le tausaga lea o le 13 tausaga, o la e lava e i ai i le tulaga pei e muamua lava lona mafaufau e le i matua, tulou. A silasila foi i le faatulagaga a i latou e i ai le tomai faafomai, e fesili pea lou loto, aisea na tavavae mai ai le vaega 12 tausaga agai lalo, e ese le tui na fai ai i latou. Na pau lava le tali tatou te maua i le latou foi silasila faa-fomai i ai, o le vaitau lea o le 12 tausaga agai i lalo, o la e maaleale lava lo latou tino, mautinoa e aafia ai ma le mafaufau, lea la o le a 12 tausaga 13 tausaga lea o le a tatala e tatou. E pei o le popolega lona. I lou foi taofi, o le a lamatia le maopoopoga ma le mapo o le Tulafono Tau Aoaoga i le Education Act o le 2019, o lo o manino mai ai le compulsory education, e ao ina faamalosia le aoga o le tamaitiiti seia oo atu i le tausaga 14. E tasi lea a tatou millennium developing goal o lea na commit ai le tatou Malo. E ui lava la o lea e faapea mai e i ai le vaega lona e aua ai ne i faigaluega pe a faapea e aafia tulaga o le aoga, peitai, o ai se e mafai ona tatou asiasia e le Matagaluega ia tulaga? Aua talitonu mai, e oo loa le tamaitiiti i le faigaluega suamalie le maua o le tupe, e drop out, e uma ai i ina ma le aoga, e le toe foi. Ae pei o le mea lona o lea sa faataoto lelei ai, faamalosia le aoga e oo i le 14 tausaga, maea lona faigaluega i le 15 tausaga. Meaane la lea ua toe taumafai e tuu i lalo i le 13, ia se i silasila ane i ai faamolemole. A na leai nei le Tulafono lea o le Compulsory Education ma malosi le faasalalau mai i le TV ma talosagaina le atunuu ma pulenuu ma Komiti Aoga ina ia faamalosia le fanau aoga, e le tuu iitia le mea lea o le fanau e feoi e faatau solo oloa i le taimi o aoga. Ae pei la o lou popolega lea o le a maua le avanoa e tatala ai, 13 tausaga po o le 12 tausaga, a o isi ua matutua pei lava e 13 tausaga.

O lea foi sa saunoa se tasi o sui usufono ananafi a o lava le manpower, le malosi o le Afioga i le Minisita ma le Matagaluega e asiasia ai, e monitor ai tulaga faaletulafono. E pei o nai atugaluga na e i ai, ia, ae o le tatou sa lava e fautele ma avatu se matou tuualalo.

O le vaega lua, o tagata faigaluega ia i fafo. Ia, e tau foi ma le Afioga foi i le Minisita ma le Matagaluega e tau faafoe nisi o faafitauli ua tulai mai, aemaise foi i latou ia na toe faafoi mai Ausetalia. Ia, o le tatou galuega lava e galulue faatasi, ae peiseai i lau lava matau toatasi, e i ai nisi o afioaga, e pei o se tasi o afioaga i Falealili, o Savaii i Safotu, ua matauina le mautu o latou faiga faavae i scheme faapea. Ia, e le aoaia e le matapia le manaia, ae atonu e aoga foi po o le a se model ma le faiga faavae o lo o fau ai e latou ia mea e fesoasoani ina ia mausali atili ai le filiga o latou e o atu i polokalame ia ina ia faaitiitia ai le afaina ma le toe faafoi mai. Faafetai lava i lau Afioga i le Minisita e auala atu i le Afioga i le Fofoga Fetalai ua vave fetalai le tofa ma fetuunai muniao ma toe vave tatala a tatou fanau. E popole lava ne i mea foi ua liliu ane le tofa ia Ausetalia ia apo atu nisi o le Pasefika, ae afaina ai le tatou maliega i lalo o le PACER PLUS. O le tulaga foi lea e i ai i le popolega i le toatele e o i fafo, e manatu e le o se mea fou lea mea. Ae i le vaavaai atu a oo ina faataunuu nisi o fuafuaga aemaise i le vaega lea o faatoaga, atonu o i ina o le a maua ai se isi faatosina o le taofiofi o le o i fafo. A o le taimi lenei, atonu e aoga foi le o foi mai, fai a latou pisinisi laiti, taavale taxi, faleoloa, e fesoaoani e faamalosi atili ai foi le tatou private sector. Ia pei ona silafia le private sector o le vaega lea e uunaia le economy o le atunuu.

O le tulaga mulimuli lava lea, o le tatou gagana po o le vaogagana o lo o faaaogaina i le aumaiga o le Tulafono. E taua tele le tulaga o le fealofani o le gagana faa-Peretania ma le gagana Samoa. Ua toatolu pe toafa sui usufono ua tagofia le mataupu lea. E i ai nisi o tulaga pei tatou te faatalasua i nisi o upu o le gaga. Ia, o tulaga masani ia e le o se mea leaga lea mea. A o lou popolega, ina ne i fai fai ma tatou suaga ae mau ai pea upu ia i totonu o faamaumauga. E leaga o le galuega a le Komisi o le Gagana Samoa la e fai, e alu alu lava finauga i uiga o nisi upu ae i latou sailiga, ona pei lea e lilifa i upu ua faaoga e le Maota lenei. O le talitonuga, o le tofa ma le utaga loloto i le tatou gagana, vaogagana eseese e afua atu i le Maota lenei, o lo o i ai le au Ulutaia. A faapea la e valetuulima se i tulou o le upu e to ia te au la tatou gagana e faamaumauina, e au ina afaina le tatou gagana, aemaise fanau a taeao. O le saunoaga mai a le Afioga i le Miinsita, e lua lava nai upu ia e fai ma faataitaiga. Aumai le gagana faa-Peretania o le harassment. E manino lelei le uiga o lea upu. Oxford Dictionary fai mai, intimidation, threatening ma mea faapena. unwelcome conduct. Sau i le Temporary Dictionary ua taua mai e illegal, ae sau le tatou faa-Samoa o le harassment ua faapea mai, o le faasoesa. Faamolemole, e faapei lava ona eseese o sasae ma sisifo, e faapena ona eseese o upu nei. E le o se upu solitulafono le faasoesa, e le o se upu

leaga foi. O la e silafia o la e faafofoga Samoa. Ia ona oo mai loa lea i le sexual harassment, ia ua atili ai ona faaletonu.

Ia na ona soso atu faapena, o le taua ia o le tatou gagana. Silasila foi i le aso ananafi ina ua teena mai foi e se tasi o sui usufono le upu na faaaoga mai e le Afioga i le Minisita o le Soifua Maloloina, ia o le vave ia. Tulai mai le Afioga i le Minisita, sui le upu, ia aveese la papa ae tuu i ai aumai faamatalaga faamaonia. O le oa o le tatou gagana, o tatou gagana eseese, gagana tuusao, o le gagana lea ta te manumanu i ai, aemaise mea nei o Tulafono ina ia aua lava ne i i ai se finauga e fai mulimuli pe a tau faaletonu uiga o upu. E i ai lava le taimi tatou te talanoa ai i le gagana foi faafailauga maotua e pei o le taeao nei, e ese le manaia ma le aoga. A o le gagana ia o tatou Tulafono, ou te tatalo atu faaaoga le gagana tuusao faigofie, ina ia fealofani le gagana faa-Peretania ma le gagana Samoa.

Ia, pau lea o sau soso atu, ou te manatu o lea ua taea uma foi e le toatele o sui usufono nisi o mataupu sa ou fia tautala i ai, ae toe momoli atu lava le faafetai tele lava i le Matagaluega i le Afioga e auala atu i lau Afioga i le Fofoga Fetalai, ia e tusa foi ma lenei galuega tele. Ia manuia le tatou Fonotaga.

FOFOGA FETALAI: Malo faafetai saunoa i lau Afioga i le sui usufono mamalu mai Sagaga 2 e tusa ai foi ma le fesoasoani i le tatou Tulafono. O lea foi ua paia le tulaga o le tatou gagana, ia e pei lava ona silafia o lea lava sa faailoa atu e le Nofoa, o lo o taumafai lava le tatou Ofisa, ina ia faaliliu pea faale-Tulafono i sailiiliga o lo o i totonu o le tatou Maota.

Ia ae faafetai mo le faasoa, o lea ua maua o le a faapena foi ona fesoasoani aua le agai i luma. A o le agaga lava ia, ia e moni lava le saunoaga, e tatou te taumafai lava i ni upu faigofie ina ia faamalamalama ai le tatou gagana. O le mea lea, malo faafetai mo lou sao.

Ia talitonu foi o lea e matau atu, o lea ua tele ina maea tatou sui usufono, ia ou te iloa foi o le avanoa lea i lau Afioga i le Minisita e te tulai mai ina ia faamalamalama atili le... ia aemaise foi o nisi itu na laga e le paia o le Maota.

Ia o le taimi nei ou te tapa ai lau Afioga i le Minisita o le Matagaluega o Pisinisi, Alamanuia ma Leipa, tulai mai e tali fuaitau i mataupu sa laga e sui usufono mamalu i le Tulafono Tau Faaofi.

Lau Afioga i le Minisita.

Tofa Hon LEATINUU WAYNE SOOIALO: Ia e muamua ona momoli atu le faafetai tele i lau Afioga i le Fofoga Fetalai, ona o lea ua maua se avanoa faaauuro, ina ia mafai foi ona talifuaitau atu ai i mataupu ua uma ona faataatia i le Laulau-a-Fono. Ia aemaise foi se faafetai faapitoa i afioga i sui usufono ia ma i latou uma lava sa maua le avanoa e faatinoina ai foi se faamatalaga foi po o ni fautuaga i tulaga i lenei Tulafono.

E toatele i latou sa luita le Tulafono, po ua lelei ona fai. E i ai foi latou sa luita le Matagaluega, pe mafai ona faatino le Tulafono. Ia e faapena foi i latou sa luita le Minisita po o le a le tulaga e tataua ona faataatia ai leni Tulafono.

O lea ua mafai ona faamauiina uma lava o outou manatu, ia aua foi le tatou agai i luma ma faamauiina aua se toe iloiloa i le tulaga i le tatou Tulafono. O i latou uma foi sa maua le avanoa e faasoa mai ai, faafetai lava. E leai ma se manatu e faaletonu. E leai foi ma se manatu e le o faamauiina. E taua uma o outou manatu lau Afioga i le Fofoga Fetala, e ala i leni Tulafono.

O le mea foi lea ua mafai ai ona tuu atu lava le avanoa, ina ia outou faasoa mai ai ina ia mafai ona auiliili leni Tulafono i se tulaga lelei e mafai ona taatia ai. Ae e le gata foi i lea, o lea o le a tuuina i le Komiti, e toe maua ai foi isi avanoa e mafai ona faasoa i ai ia mo le agai i luma, ina ia mafai ona toe tuuina mai i le Palemene. O lona uiga e tele a tatou avanoa e mafai ona faatinoina ai ia manatu aemaise foi o ni fautuaga ua uma ona faataatia.

I le faamauiina, e toa-15 i latou ua uma ona saunoa i leni Tulafono, e toa-15 sui usufono ua uma ona saunoa. O lo o i ai sui usufono e 5 o le Komiti e ave i ai le Tulafono leni e iloilo ai lea sa saunoa ai le Taitaifono o le Komiti, saunoa foi le Sui Taitaifono o le Komiti, saunoa foi nisi o i latou e i ai i totonu o le Komiti leni Faa-Palemene e iloiloa le mataupu leni. So, e taua tele la ia i latou ua faaali o latou finagalo, ona o lea e i ai le tatou Komiti. O lea ua saunoa, o lea foi ua saunoa le Taitai foi o le Itu Agai, o ia o lo o nofo ma le ogaoga o metotia eseese. E le gata i lea, a o fautuaga e pito sili ona taua ua uma ona tuu mai mo leni Tulafono.

E pei ona faamauiina, o leni Tulafono ua leva ona faaofiofi mai i le tatou Palemene. Ia ona o tulaga foi e le i mafai ona faatinoina i lena vaitaimi, ia o lea ua maua ai leni vaitaimi, o lea la ua ou tilotilo atu, e aoga tele le Tulafono lea mo le aotelega o kamupani maoti aemaise foi Matagaluega Tumaoti a le Malo o lo o i ai i le taimi nei po o SOEs e 27 o lo o i ai i le taimi leni. Taatia ia le Tulafono a le PSC, o lea ua uma ona i ai iloiloa e faataatia ai foi le iloiloa o lo o i ai le tulaga lea i faiga faavae foi a le Matagaluega o lo o i ai.

Ae silasila foi outou, o le Matagaluega leni a Alamanuia ma Pisinisi e lavea la i lalo o le PSC. Ae o lea e faatino e latou le Tulafono lea, ona o i lalo o aiaiga o le Tulafono o latou e faatinoina le galuega lea. O lea la e taua ai tele le tulaga lea ua i ai le tatou Tulafono i le aso.

E muamua ona ou faamalulu atu, o le a fai le aotelega i le folasaga ia i latou na aumai a latou fesili, aumai foi ia latou tuualalo, aumai foi ia latou fautuaga. Ia e pei ona fai atu i le taimi ua tuanai, ia o lea e faalogologo atu ia le Matagaluega ua uma ona faamauiina, o lea foi e silasila mai le Taitaifono o le Komiti Faa-Palemene aemaise le Sui Taitai aemaise i latou o lo o i ai i totonu o le Komiti leni, i le taua o le avanoa lea o le a tuu i ai.

E faafetai foi i le Afioga i le Fofoga Fetalai ua maua se avanoa faaauuro e mafai ai e sui usufono taitasi uma o lenei Palemene ona faaali o latou manatu. E faaali o latou manatu e aunoa ma se faauilavea. Ia e faamalulu atu foi i nai faauilavea na avatu. Ia ua ala la ona faauilavea ona ua faauilavea muamua isi. Ae o le agaga lava ia o le Minisita, e tuu lava outou ina ia maua mai le folasaga lelei e mafai ona fau ai le tatou Tulafono. Ia o le mea la lea sa taumafai ai lava ae ona o le tele foi o manatu ua mafai ona faaalua, o lea la ua le mafai ai ona taofi ia le avanoa lea e faauilavea ai. Ia a outou silasila mai i le Minisita, ia sa nofonofo lava ma taputapu ai aua foi le faasoaga o mafauauga, e uiga i le tatou Tulafono.

O le isi mataupu e ao ona tatou silafia, e i ai se taimi ona tautala lea i ai, i le tulaga lea o galuega faavaitaimi. O le a oo i ai se faamatalaga ona e fai lava si ogaoga ma tele o faafitauli. Ae a tilotilo la i faafitauli o galuega faavaitaimi, tilotilo i le aofaiga o tupe maua, ia i le piriota e 2020/2021 ia Tesema, e ova ma le \$600 miliona le tupe na maua mai i mea ia o tupe faamomoli mai i fafo. E le gata la i tulaga i tupe maua mai galuega faavaitaimi, a o le faataasiga lea o tupe maua mai ia i latou foi i o tatou aiga o lo o i ai i fafo. O lea la e i ai le aotelega lea.

A fuafua la i ai, i le 8,000 o tatou tagata faigaluega o lo o i fafo, e tele le fesoasoani mo i tatou. E le o taumafai nei le Malo e taofi ia le tulaga lea, ae taumafai le Faigamalo e toe iloilo ia le mataupu ina ia mafai ai ona taatia i se taatiaga lelei aua foi le agai i luma.

Ae o le a taumafai atu ia se folasaga ia i latou sa fesiligia le tatou Tulafono. Ia o le Faavae o le Malo Tutoatasi i le 1960, ia o le Tulafono aupito maualuga lea o Samoa. O lo o faataoto ai aiatatau mo tagata Samoa e aofia ai o le faasaolotoina, faasaolotoina o le faamalosiina o e faigaluega. E saoloto ma Tulafono faailoga tagata. O le tasi lea mataupu sa ausia, saolotoga o le faatuina o aai o faalapotopotoga ma ni faalapotopotoga soofaatasi.

O le Tulafono o le Sootaga Va Lelei o Galuega ma Leipa 2013, Tulafono o Galuega a le Malo po o le Public Service Act 2004, Tulafono o Aso Malolo o tagata uma Public Holidays, Tulafono o Saogalemu ma le Soifua Maloloina o Galuega, o Tulafono Autu i e fitoitonu i le puipuiga ma gafataulimaina o mataupu tau sootaga o galuega. O isi foi Tulafono o lo o i ai lo latou sootaga i mataupu tau galuega, e aofia ai Tulafono o Faalapotopotoga Soofaatasi o lo o limataitaiina le resitalaina o iuni po o faalapotopotoga soofaatasi. O Tulafono o Vaa 1998, e faapitoaugafa i tagata faifaiva ma le auvaa. Tulafono o Aoga 2009 ona o lo o taua ai le tausaga aupito maualalo mo le faafaigaluegaina o fanau ma le Tulafono o Soligatulafono Crimes Act o lo o i ai tapu ma sa mo le faamalosiina o faigaluega ma le aumai faanana o tagata po o force labours.

O le taua o nei Tulafono eseese i le sootaga ma galuega o le tasi lea mafuaaga e pei ona ou taua i lau uluai folasaga o lenei Tulafono Tau Faaofi, na ala ai ona faatinoina ai ni suiga talafeagai i lenei Tulafono Faatonutonu

aua le faaleleia atili o fesootaiga i le Tulafono Tau Faaofi o Teuteuga o Sootaga Va Lelei o Leipa ma Galuega 2022 ma isi Tulafono taua.

O le Tulafono o Sootaga Va Lelei o Galuega ma Leipa, na soloia ai le Tulafono o Sootaga Va Lelei o Galuega ma Leipa i le 1972. O le LERA po o le 2013 po o le Labour and Employment Relations Act na sosolo lava i luga o autu po o faiga faavae i le 1972 faatasi ai ma le faaopoopoina i ai o ni suiga talafeagai ina ia faaleleia atili ai sootaga manino ma taiala po o feagaiga a le Faalapotopotoga Faava-o-Malo o le Leipa po o le ILO. E taua tele foi ia lea faalapotopotoga i le tatou Tulafono lenei ina ia maea ai le sainia lelei o maliliega ina ia auai atu ai Samoa i le ILO i le tausaga 2005.

O ni Vaega taua o le Tulafono na toe faaleleia atili i le LERA 2013 e aofia ai le faatauaaina o le aiatatau, faatuina ai o ni faalapotopotoga ma ni faalapotopotoga soofaatasi, aso malolo mo tina, failele ma tama, o pepe meamea, ma le faamalosia o le tapu o faiga faailoga tagata i totonu o galuega ma falefaigaluega. Na faamalosia ai foi le LERA i le 2013, le faatuina ai o le amataina o le Fono Aoao Faatafatolu, Samoa National Tripartite Forum. O lo o aofia ai sui o faipisinisi, aufaigaluega a le Malo ma so latou sao taua i le soalaupuleina o mataupu tau sootaga o galuega.

O lo o manino i le vaega 3, vaega 4 o le LERA, le faaaoga o lenei Tulafono mo e e ana galuega ma le aufaigaluega. So e taua lenei Tulafono mo le aufaigaluega ia aemaise foi latou e ona nei galuega. O pisinisi tumaoti uma po o pisinisi tau atiae, e le o ni pisinisi a le Malo ma faalapotopotoga taitasi a le Malo e pei ona faamatalaina mai i lalo o le Tulafono o faalapotopotoga a le Malo o faatinoga o galuega ma le mafai ona tali atu po o le Public Bodies SOE.

O le faalauiloaina, faagaioiina ma le faamalosia o le Tulafono o le Sootaga o Va Lelei o Leipa 2013 o le matafaioi lea o le Vaega o Sootaga Va Lelei o Galuega ma Leipa i lalo o le Matagaluega o Pisinisi, Alamanuia ma Leipa.

O le Tulafono o Galuega a le Malo po o le Public Service Act, o le Tulafono Autu lea o lo o faafoeina ma gafataulimaina ai aiaiga o le faafaigaluegaina o le aufaigaluega a le Malo. O lo o i lalo i le vaavaaiga a le Komisi o galuega a le Malo. So o lea la e i lalo o le PSC le vaega lena. E taua tele le nofo malamalama o sui usufono mamalu o le tatou Palemene i le fesootaiga o le Tulafono lenei o le Sootaga o Va Lelei o Galuega ma Leipa 2013, ma lona Tulafono teuteu 2022 lea e i ai le Tulafono lea e tatou te talanoaina ma le Tulafono o Galuega a le Malo po o le Public Service Act 2004 o lo o faavaeina ai aiaiga terms and conditions. O le faafaigaluegaina o le aufaigaluega a le Malo, e le o aafia i lalo o le Tulafono Autu ma le Tulafono Teuteu o lo o tatou soalaupule i le aso.

E pei ona taua i le taimi ua fano, e tolu lava ni vaega taua ua mafua ai ona teuteu, o lo o faamaonia i totonu o le Tulafono Tau Faaofi o Teuteuga o Sootaga ma Va Lelei. Ou te talitonu o lo o malamalama lelei i latou sa avea

foi ma Kapeneta i tausaga ua tuanai ona ua leva ona fofou mai lenei Tulafono i le 2018. So o lea la ua faatinoina i le aso.

Ina ia faasao ma faamatala le auala faigofie o uiga o upu, e taua le Tulafono ina ia laugatasia ai le silafia e tagata e ona galuega i tagata faigaluega i mataupu e aofia ai tuutuuga ma aiaiga o galuega. Ia o lea foi ua tatou iloa i le aso, e i ai nai upu e le fesootai ma le Tulafono, ona o le faaliliuina. Ia tasi la lea tulaga e tatau ona tilotilo lelei i ai le Komiti, ina ia aumai se fautuaga, aumai ni upu sao, ma ni upu Samoa e talafeagai mo lenei Tulafono.

Faaleleia o fesootaiga e auala atu i le Tulafono Tau Faaofi o Teuteuga o Sootaga Va Lelei o Leipa ma Galuega 2022 ma isi Tulafono. E pei o le Tulafono o Soligatulafono 2013 ma le Tulafono o Vaa, tausisia pea le va o Tulafono Tau Faaofi o Teuteuga o Sootaga Va Lelei o Leipa ma Galuega ma Feagaiga ma Faalapotopotoga Faavaomalo o Leipa, ILO, ua maea ona sainia ma faamaonia e pei ona outou silafia. Ia o lea foi e sosolo lava fautuaga ia ma suiga o lenei Tulafono i lalo o iloiloga a le Vaega lea o le ILO.

O lona uiga, o le a foi ni fautuaga ua oo mai ia o lea e tatou te sosolo ai lava. Ia ae pule lava tatou, a faapea e tatou te fia usitai i ai, ia o tatou usitai i ai, ae a faapea e tatou te le fia usitai i ai, ia o le mea lena e filifili i ai ia le tatou Komiti o lo o ave i ai ia le tatou Tulafono ina ia fuafua i ai pe usitai pe leai. Ia e tai pei foi i le vaega lea a le UN lea na tatou mulimulitaia i le tele foi o nisi tulaga e tatau ona o tatou oo i ai.

Mo se aotelega o mataupu o finagalo sa saunoa i ai le mamalu o le Palemene e faatatau i le Tulafono Tau Faaofi. Ia o lea o le a taumafai e tali atu ia mataupu na laga e sui usufono mamalu i le faasologa o suiga o lo o i ai Tulafono teuteu. Ia e pei ona ou talanoa atu i le taimi ua tuanai ona o outou fautuaga ia ua aumai lea ua amata ona faataatia i i, ia e taumafai lava ina ia faataua foi le taumafai mai ma... aemaise foi outou finagalo ina ia mafai ona faufau lelei ai ia lo tatou Tulafono.

O le iloiloina o le Tulafono Autu na mafua ai lenei Tulafono Teuteu sa amataina mai i le tausaga e 2018. Sa faatinoina uma e le Matagaluega masani mo le faatalatalanoaina, faalauiloaina o vaega fou o le Tulafono Teuteu i paaga masani i Upolu ma Savaii. Ma na aofia uma ai kamupani i pisinisi eseese o vaega tumaoti, sui o faalapotopotoga a le Malo, sui o afaigaluega, ILO, ma isi paaga masani.

So, mo le silafia ia, o lona uiga, o nei consultations po o nei faatalatalanoaga ia ua leva ona tapena mai. Ia a faapea o le 2018, 2019, 2020 ia fuafua atu i ai, ia pe ua tolu tausaga talu ona faatino mai. So, ua matua mautu lelei le aotelega o nei tulaga.

O le teuteuga fou i le vaega 4 ma le 5 o le Tulafono i le tofiaina po o le aveeseina lea o ni sui auai o le fono aoao faa-tafatolu, ua faia lea suiga ina ia faafaigofie ai le faatinoina e faalapotopotoga o i ai o latou sui i fono aoao faa-tafatolu i latou filifiliga saoloto, nominate o latou sui e auai i le national

i le komiti lea, ae na o le faamaonia lava e le Kapeneta o sui filifilia. O lona uiga, o lea ua aumai le malosi foi o le puleaga e mafai ona filifili ai e aunoa ma le Ao o Le Malo ia ina ia mafai ai ona faafaigofie tulaga ia. Ae e pei ona fai atu, o lea ua faamauina ia talosaga na tuu mai ona o le taua foi o lenei fuafuaga.

Ia lea e faafofoga mai le Taitaifono ma le Sui Taitaifono o le Komiti, a faapea lava e tou te silafia e tatau ona toe tuu i ai, ia o le mea lena a outou e fai, aumai lea o se fautuaga lelei ina ia mafai ona aafia ai. Ia ae i ai foi tulaga e aupito sili ona taua, e aoga foi i ai le Ao o Le Malo. E le o aveesea Le Ao o Le Malo e tai pei o le tulaga i le totogi lea maualalo e i ai e tatau lava ona ia sainia. Ia ae o isi la tulaga ia, o lea la ua tilotilo i ai le toe teuteuga o le Tulafono lea, ia pe le tatau loa ona aveese si toaina, ia ae faatino pea e le Matagaluega le tulaga lea.

O le isi tulaga o suiga fou ua tapa ai na o finagalo o le Kapeneta pe a fia aveeseina se sui o le fono aoao faa-tafatolu ona o ni mafuaaga talafeagai ua taua i totonu o le Tulafono Tau Faaofi. Ua faia ia suiga fou ina ia faafaigofie ai le faatinoina o galuega faa-failautusi a le Matagaluega pe a manaomia se suiina o ni sui o le fono aoao faa-tafatolu. Ua faamauina foi fautuaga ua tuuina mai e sui o itumalo, itumalo o Lepa ma le itumalo o Anoamaa ma Satupaitea mo le tuuina atu i le Komiti a le Palemene, i le taimi e toe iloiloina ai ma lauililiuina ai le vaega e 4 ma le 5 o le Tulafono. O lona uiga, ia a outou afioga i sui usufono o lea e maua lava avanoa e mafai ai ona faatinoina ia fautuaga ia ua uma ona aumai.

O lo o tumau pea le aiaiga po o le poloaiga e sainia e Le Ao Mamalu o Le Malo, ia faasalalauina o le totogi maualalo ia po o le minimum wage ona o se tulaga lea, e faataunuuna pe o poloaiga taualoa a le Malo. O lona uiga, o lea lava e i ai Le Ao o Le Malo i totonu o le faatinoina o tulaga ia. O lenei mataupu e mafai ona toe iloiloina e le Matagaluega ma le Ofisa o Tulafono aemaise o le Ofisa o le Loia Sili. O lona uiga, ia o nei lava mataupu uma ua o tatou talanoaina i le aso, o lo o i ai lava le avanoa e mafai ona faatino ai ia pe toe teuteu ai foi.

O le iloiloiga o le polokalame o galuega faavaitaimi. Ia e pei ona ou faatonuina ai le Kapeneta ma le Matagaluega o Pisinisi, Alamanuia ma Leipa, ina ia faatinoina. O le a toe tagatagai i ai e faataataatiaina lautele o lo o i ai i le taimi nei. E aofia ai le toe iloilo o faavaa o faiga faavae o auala ma Tulafono uma a le Malo o lo o faafoe ai polokalame i galuega faavaitaimi i Ausetalia ma Niu Sila.

Ia ou te talitonu e tele ni manatu ua uma ona aumai i le tulaga i galuega faavaitaimi. E sao uma lava tulaga ia sa outou fautua mai ai. E i ai foi isi fautuaga na aumai, e leai e le o taofia e le faigamalo le tulaga lea e i ai, ia ae sa i ai le faatalanoaga ma le High Komesina o Ausetalia ma le High Komesina o Niu Sila ina ia aua ne i taofia, ae taumafai la e faa slow down

laitiiti. Ia aua o le mea lea sa i ai, e tolu i le fa ia faigamalaga i le masina e ave ai a tatou tagata faigaluega.

I le taimi lenei i le va o Me ma Novema, e 3,900 tagata o lo o i Niu Sila i le RSE, e tataua ona toe foi mai ua uma le latou konekarate. A fuafua la i ai i le va lea, o lona uiga, e tele lava ni avanoa e mafai ai ona toe faafoi mai o tatou tagata o lo o i ai. E i ai foi le isi mafaufauga lau afioga i le Fofoga Fetalai, a faapea e 8,000 tagata ia e i fafo, ae a na vaevae i itumalo e 51, sue mai lava le aufaigaluega a le itumalo ia pe 157, e faamaopoopo mai ona aumai lea e fai ai le process lea. Ae se paga, e le o le faiga lena o lea e fai ai nei. O lo o fai lava e le aufaigaluega i luga o lo latou silafia ma le iloa, o ai e alu ae o ai e nofo. O ai e agavaa ae o ai e le agavaa. Ae pei ona outou aumaia se fautuaga, e i ai isi ua leva ona talosaga i le polokalame, 2 i le 3 tausaga e le alu. Ae oso atu le isi faatoa tasi le masina, ae tietie i le vaalele ma alu. O lona uiga e i ai mafuaaga ua ala ai ona tulai mai tulaga ia.

O le a aofia ai le iloiloga o le mataituina o faatinoga o galuega a le Matagaluega seia oo i le faiga faavae faale-Malo mo le faaleleia o le tulaga tau tamaoiga aemaise o atugaluga tau aiga ma le saogalemu o tagata faigaluega.

Ia e tele nai faafitauli o lo o i ai e tataua foi ona silafia e lenei Maota. E i ai le vaa lea o le a toe faafoi mai ai i latou ua o ese ma a latou galuega. Ae silasila foi outou, o Visa ia e o ai ia aufaigaluega i Ausetalia ma Niu Sila, o Visa faapitoa e mafai ona tuuina atu mo galuega ia a faatoaga. E le mafai ona e tafao ai i o, e le mafai ona e alu ese ai ma tulaga ia. O lea foi la ua i ai le faafitauli, ia ou te le ma e tau atu. O le flight lea o le a sau nei, o lo o aumai uma ai i latou e ova ma le 200, o i latou e faafitauli i le polokalame lenei ona o le le mafai ona aumai taitoatasi i latou ona o le leai o ni vaa, tapunia ma borders, e le mafai ona a ulavale loa le tagata aumai. E leai, e faaputu ma faaputu ma tilotilo i ai pe le mafai ona toe suia le toatele o latou e le toe sui.

E i ai foi latou sa o o single, ae omai iinei ia ua sau ma le infant. O lona uiga, ia o mea uma lava sa tutupu faapea, ia o lea ua sau ma aumai lona alo i galuega faavaitaimi nei ua le mafai foi ona toe agavaa i ai. Ae le gata i lea, ua ova atu ma le toa 18 i latou, ua faamanuiaina i le tulaga o le tulaga lea ua faamanuiaina. Ia o lona uiga, ia e nofo lava i o ma faigaluega ma faamanuia ai lava. Ia o le tulaga la e i ai, ua le mafai ona o latou faatinoina galuega ia, lea la e aumai, o le ogaoga ia.

O le isi tulaga a outou afioga, o lea e iinei le tina ma le fanau, ae tilotilo atu i le facebook, o lea e fai mai le faaipoipoga i Niu Sila. E le i tatalaina le faaipoipoga. O i latou foi o nai matua po o nai tina foi sa sainia ia forms ia e malie e alu lona toalua i o, o lea ua toe omai toe cancel le consent form. Ia ae e le mafai ona fai faapena. E tataua ona iloilo lelei ma aumai se lipoti mai i o, o lea la o le a sau faapitoa le vaa lea e aumai ai ova e 200, e faatali uma ai lava i latou o lo o omai ai.

O ogaoga ia, o lea ua mafua ai ona toe tilotilo ia le tatou faigamalo e toe iloilo ma review le program lenei. Ua maea na faamaonia e le Kapeneta ma sa ave le talosaga a le Kapeneta ina ia fai se Komiti Faapitoa e iloilo ina pe review ina le program lenei mo le agai i luma. O le a nafa tonu ma le faatalanoaina ma faafoeina o lenei iloiloga.

O le Komiti ua filifilia e aofia ai Matagaluega ma vaega maoti nei. O lea la ua uma ona faamaonia mai e le Kapeneta ia le Komiti o le a iloilo ina o lea o le a amata le galuega i le vaiaso fou, e iloilo ai la le tulaga lea. O lea o lo o i ai le Matagaluega o Pisinisi, Alamanuia ma Leipa o latou e latou te taitaiina le Komiti, Matagaluega o Tina ma Tamaitai, Atinae o Nuu ma Agafesootai, Matagaluega o Mataupu Tau i le Va i Fafu, Fefaatauaiga po o le Foreign Affairs, Matagaluega a le Palemia ma le Kapeneta, Ofisa o le Komesina o Niu Sila, ona o latou o donors partners lona uiga e i ai o latou sui i totonu o le Komiti lenei.

O le Ofisa o le Komesina o Ausetalia, ia e ala atu la i le tatou Foreign Affairs o le a ave i ai se tusi ina ia talosagaina ai ni sui o le High Komesina o Niu Sila ma Ausetalia, ina ia i ai i totonu o le Komiti. Faalapopotoga o Leipa Faavaomalo po o le International Labour Organisation, Samoa Chamber of Commerce, o latou ia o lo o aafia tele i tagata faigaluega ua tuua galuega, Samoa Association of Manufactures and Exporters, ia o Samoa Hotel Association, Samoa National Council of Churches, o latou foi ia o le a i ai i totonu o le tatou Komiti lea. O le Private Recruiter po o le vaega lea i Falealili i Poutasi o lo o i ai le Falealili Trust Fund o lo o i ai foi se latou sui. Ma le fono tagata faigaluega o Samoa po o le Samoa Workers Congress. O latou la lea lea ua faia ia le Komiti lea, e iloilo ina ia tulaga ma le process e tataua ona i ai, ina ia faamalieina ai itu e lua i le tulaga lea, ae faifaimalie pea le o i fafo o tatou tagata faigaluega.

O lea ua uma ona faamaonia e le Kapeneta e tasi le flight e alu ia Me, tasi Niu Sila, tasi le flight e alu i Ausetalia, ia e ova atu ma le tai 300 latou o lo o o ai, ae o le a le taofi la. E fua la isi talosaga a le Kapeneta i isi foi malaga o Iuni, ia faasolosolo atu lea ma Iulai pe a fua lona i se fautuaga, e aumai e le Komiti lea ia mo le agai i luma.

O galuega ma vaega o le a agai i ai le iloiloga o le faatulagaina lelei i totonu o pepa taiala. E i ai le terms of reference o le Komiti lea, ua uma ona faataatia. Sa i ai foi se fautuaga na aumai ina ia i ai se konesale, ae e talitonu Minisita ma au nei, e le manaomia se konesale. O le mea lea e manaomia le common sense po o lea tulaga, ina ia mafai ona faatino ai le tulaga lea mo le agai i luma.

Ua faamauina fautuaga ma manatu faatupu manatu ua tuuina mai e sui usufono mamalu o le Palemene e faatatau i galuega faavaitaimi. Ma o mataupu lava ia o le a agai i ai le iloiloga o le polokalame. Ia o lea foi ua avanoa ia le Komiti e agai i ai, ia aua foi se fautuaga e aumai e le Komiti i tulaga ia.

O le mataupu o le Pacific Engagement Visa e pei ona saunoa i ai le sui usufono o Anoamaa 2, o se mataupu le mautinoa ona o le polokalame o lo o folasia e nisi o Vaega Faaupufai a Ausetalia le Labour Party pe afai e manuia mai le palota tele a Ausetalia o lo o fuafuaina i le aso o lenei masina o Me 2022.

Mo sui usufono mamalu na saunoa faapea ua taofia pe o le a aveesea e Ausetalia le tulaga lea, ia e leai se tulaga faapena o i ai. O polokalame mo le silafia, o lo o faaauau pea feutagaina mo le fausiaina o le auivi fou o le galuega faavaitaimi i Ausetalia i lalo o le faamalumaluga a le polokalame e taua o le Pacific Australia Labour Mobility po o le PAM. Ia manatua foi o polokalame ia o Ausetalia aua o Niu Sila o le RSE. O le scheme lenei, o i ai le fuafuaga a Ausetalia e tuu faatasia i lalo o le PAM le seasonal workers programme po o le SWP ma le Pacific Labour Scheme po o le PLS a Ausetalia, o lo o agavaa ai o tatou tagata i le taimi nei. O nisi suiga talafeagai o le i ai i lalo o le PAM, e aofia ai le faaleleia atili o le puipuiga o aiatau a le aufaigaluega faavaitaimi, aemaise ai le maua o ni avanoa e faatupulaia ai lo tatou tamaoaiga, i le faafaigofieina lea o aiaiga e mafai ai ona fesui ai a latou employers pe a talafeagai ai ma manaoga o ana galuega ma tagata faigaluega. O lona uiga, e lelei foi le suiga lea o le a i ai ua tuu faatasi ai polokalame ia i lalo ina ia tilotilo i ai, aemaise tatou fanau o lo o i Ausetalia, lea tou te silafia le mea na tupu, lea na oo lava i totonu o le Palemene o Ausetalia le complain a nisi o fanau ma tulaga faapena, ua le lelei ona faatino le tulaga lea e i ai. Ae ao foi ona silafia e tatou fanau, e le o ni galuega ofisa sa o ese atu ai ma i inei, e galulue i le timu, e galulue i le malulu, e galulue i le mutinitini o le la. O tulaga foi ia e tatau ona silafia lelei e tatou tagata faigaluega le mea sa agai atu i ai.

Ua faamauina le fautuaga ua tuuina mai e le sui usufono mo Vaimauga 2 e faatatau i le Vaega 16 o le Tulafono i le logoina lea o le o lo o nofoia le fale, po o tenants ia a i latou i taimi e fai ai asiasiga ma le tagata e onaina le fale, pe afai o le a faataunuuna ni asiasiga po o ni suesuega i le maota e nonofo ai latou. Mo le silafia, i le capacity lea e i ai le MCIL, o lo o lava ma faatinoina asiasiga ma tulaga uma ia. O lea foi ua uma ona faamauina ma faamaonia e le Kapeneta o lo o i ai nisi tagata faigaluega fou se 6 ua mafai ona tuuina mai i le MCIL ina ia lelei ai le capacity lea ma tulaga faapea. O le faatinoina o le galuega, o le matua lelei lava, a o le process la lea e tilotilo i ai, o le tulaga lea o lea e... Ia o le mea masani lava, so o se Tulafono lava, a uma ona faataatia le Tulafono, faataatia ona aiaiga, faataatia pe faapefea ona enforce, ia o tulaga uma lava faapena o lea ua sauniuni i ai le Matagaluega ona e le o se Tulafono fou o le Tulafono ua leva, a o lea ua toe teuteu.

O se talifuaitau atu i le saunoaga a le sui usufono mo Satupaitea e faatatau i le malosiaga, powers ua tuuina atu i le Ofisa Asiasi ma le Ofisa Sili o Pulega o le Matagaluega ma le reasonable time. E pei ona taua i le taimi ua

fano, o le a toe auiliili lelei i totonu o Tulafono Faatonutonu taualumaga ua limataitaiina ai galuega a Ofisa Asiasi, e aofia ai foi le faatinoina o asiasiga, suesuega, faasea e tuuina mai e isi foi vaega ina ia mulimulitaia vaega uma o le Tulafono. O lona uiga, lau Afioga i le sui usufono mo Satupaitea, o lea ua alo atu le Matagaluega ina ia tilotilo lelei i le tulaga lea mo le agai i luma. O le a toe faamanino, faamalamalama atili aiaiga o le faatinoga ma le faasologa o galuega a Ofisa Asiasi pe a fausiaina Tulafono Faatonutonu.

O le manatu ua faaalia, e tapa se warrant tusitusia, fai mai o lea e manaomia le warrant, tai pei o le warrant lea e fai e leoleo ina ia mafai ai ona faatino. O lo o i ai foi le Tulafono a Leoleo o lo o i ai foi le Tulafono a le MCIL e mafai ai ona faatinoina galuega ia, e aunoa ma se warrant. Aua a faapea o le tulaga lena e i ai, e le mafai lava ona faatinoina le tatou Tulafono, ona e tataua ona omai i le Faamasinoga e avatu ai e le Judge tulaga ia. Ae tilotilo lelei i ai.

E talosaga atu foi i le sui usufono mo Vaimauga 2, ia susu mai i le Komiti e faalatele ai le manatu ina ia malamalama ai foi le Komiti mo le agai i luma. O lo o manino le faaupuga faa-Samoa o le Fuaiupu 20 o le Tulafono, e ao i se tagata e ona galuega ona totogi atu se tamaitai po o se alii faigaluega i le totogi tutusa. E le o taua po o atagia mai le mea lea, lea la sa fesiligia ai ia totogi tutusa po o tulaga ia i Tulafono Teuteu ina ia faaleleia atili ai fesootaiga, pe align. O le tatou Tulafono i Samoa, e faatatau i Sootaga Va Lelei o Galuega ma Leipa ma le feagaiga faava-o-Malo.

O le mafuaaga o lenei faiga, ina ia mafai e tamaiti amata mai le 13 tausaga ona maua se latou lesona. E pei ona silafia e i ai foi tatou fanau e fai work experience, e mafai ona tufa mai i kamupani e faatino ai galuega ia, ia o galuega mama. O le a maioio i totonu o le tatou Tulafono Faatonutonu aiaiga o tuutuuga mo le faafaigaluegaina o fanau i galuega mama ma saogalemu e aofia ai itula faigaluega, taimi o le aso faigaluega ma le isi ituaiga galuega. O lona uiga, e tataua foi ona alu i le Komiti, e pei foi ona ou fai atu i le taimi ua tuanai, o Tulafono ia e ogatasi ai ma Tulafono a le ILO po o le International Labour Organisation tatou te sosolo ai lava, ae pule lava tatou, pe tatou te sosolo ai pe tuu laitiiti i luga i le 14 ae tuu atu i le 13, ia tuu atu le isi i luga i le 17 ae tuu le isi i le 16, ae sii atu i luga i le 19 ae tuu i le 18. Ia o mea uma lava ia, e mafai foi ona tatou fautuaina ai le Komiti. O lo o faatauaina e lenei Tulafono Teuteu le taua o le faaoga o tamaiti, o tupulaga talavou atoa ai foi ma avanoa e mafai ai ona faigaluega i latou i ni galuega ua faatapulaaina aua le fesoasoani i le atiaaina o latou aiga. O le a faamanino ma auiliili i totonu o le Tulafono Faatonutonu, o le a fausia pe a maea ona pasiaina lenei Tulafono Toe Teuteu ia i le lisi o galuega mama ma tuuina aiaiga ma faafaigaluega. O mea ia, o le a fai uma lava aiaiga ma tulaga faapea. A faapea e talia, ia ua fai aiaiga, ae a faapea e le talia, ia aveese na aiaiga ae tatou toe foi lava i le tatou workforce lea na i ai muamua.

Ua maea ona tapenaina i lalo o faiga faavae o saogalemu ma...

Tofa Lealailepule Rimoni Aiafi: Lau Afioga i le Fofoga Fetalai...

FOFOGA FETALAI: Ia, se i fai sina malologa a lau Afioga i le Minisita se i tulai mai le sui usufono mamalu mo Faleata 3. Ia, saunoa lau Afioga.

Tofa Lealailepule Rimoni Aiafi: Ia pei o le agaga foi lea o le tulai atu, sina fesili foi ae se i fai sina malologa a le Afioga i le Minisita se i taumafa sina vai. Malo le onosai, e leai lava foi se mea o lau tali o sese ae talu ai ona o lea ua oo tonu i le vaega lea sa lagalaga ai finagalo o le toatele o sui usufono o lenei itu, o le mea lava lenei o le tausaga 13, aua o lea e manino, ia e moni lava a au o le tele lava o Tulafono nei, pei tatou te o foi lea e tulituliloa finagalo o Faalapotopotoga ia ma le mea o la e lilifa i ai le lalolagi, ona mulimulitai lava lea o tatou. Peitai ane, o lea foi e manino i le saunoaga a le Minisita, e fuafua lava e tatou ia aua o tatou o le atunuu tutoatasi, e fua i tatou tu ma aga na tatou ola ai i aso faipea, ia ma nisi foi o Tulafono ua tatou pasia e lenei Palemene, ina ia aua ne i feteenai.

Aua pei o le mea lea sa faamamafa ai sou manatu, o le upu lea faafaigaluega o le 13 tausaga, ua i ai le avanoa e faafaigaluega ai. Lau Afioga i le Fofoga Fetalai, o tatou uma lava na ola i Samoa. O aso ia e fai le matou umu fai foi lea po o le umu talo, e tuli mai au e lou tama ou te sau e faatau i le maketi.

Tofa Hon LEATINUU WAYNE SOOIALO: Lau Afioga i le Fofoga Fetalai, ua matua manino lava le faamalamalama a Faleata 3, ua faamauina mo le lumanai.

Tofa Lealailepule Rimoni Aiafi: Toeitiiti lava uma lau Afioga.

FOFOGA FETALAI: Ia, faauma maia le saunoaga a le sui usufono mamalu.

Tofa Lealailepule Rimoni Aiafi: Ia, ona ou manatua ai lea o le pese foi lea e sau i le leitia, mo le faatauina o fai e \$3, mo le taeina o le vao e \$2. E pei o lea toe taumafai tatou e lilifa i mea ia, se o tamaiti ia a tatou, alu e fai mai le mea lea sau ai, alu e fai mai le mea lea. Ae augata lou manatu i le mea o le upu faafaigaluega, 13 tausaga, aua o lea foi e i ai le tatou Tulafono, compulsory education, ia o le 14 tausaga. Ia na o ni tuualalo, tuualalo, o lea ua e saunoa o le a fetuunai, fetuutuunai e tatou aua tatou te mulimuli fua i mea a isi vaega. Ia ma le faaaloalo lava.

FOFOGA FETALAI: Malo faafetai mo le saunoaga a le sui usufono mamalu.

Susuga Hon Tuilaepa Fatialofa Auelua Sailele Malielegaoi: Lau Afioga i le Fofoga Fetalai, e fia fai foi sina au...

FOFOGA FETALAI: E fia faasaoina le taimi o le Afioga i le Minisita, tulai mai lau Afioga i le Taitai o le Itu Agai.

Susuga Hon Tuilaepa Fatialofa Auelua Sailele Malielegaoi: Lau Afioga i le Fofoga Fetalai, e faamalo atu i le Minisita ma teuteuga ma lana saunoaga taua foi i le matou faalogologo atu. Ia e ala foi ona avatu manatu o le faaeteetega lava i le mataupu. E lua mataupu, o le mataupu lea i le tatou aufaigaluega. E manaia lava le faamalamalama mai a le Minisita, e ala ona lagalaga taofi pe a tulai mai ni faasilasilaga, ua taofia ai a tatou tagata faigaluega, ona o lea lava e manino sa faalauaitele mai lava foi se vaega o fuafuaga a lena foi Vaega Faaupufai e omai loa lava ona taofi lea. A o lea lava ua manino le faamanino mai, e i ai nai faafitauli o lo o tilotilo i ai le Malo. Ae o lou lava taofi e faapena foi lenei Itu, e pei o aiaiga ia e fuafua malie, ae faaalu pea tagata faigaluega latou.

O le tulaga lona lua, o le itu lea sa saunoa foi i ai le Minisita ma faamanino mai foi i nisi o manatu o le tulaga lava lea i le Tulafono lenei e faapitoa na o le aufaigaluega lea i tua e le aofia ai le aufaigaluega a lo tatou Malo. A o lea la e taua le itu lea, ae pau lava lenei, ina ia faataua le tulaga lea o le ogatasi o Tulafono ia e aafia ai le aiatatau ma le puipuiga o tagata faigaluega, ma Tulafono foi o lo o puipuia ai aiatatau a i latou e faafaigaluega i lalo o le Tulafono a le PSC, le Tulafono a Leoleo ma tulaga faapena, i le mea lava lea o le puipuiga o aiatatau i le le faateaina o le tagata, aua ne i faateaina e aunoa ma ni suesuega e tatau ona fai, e aofia ai foi la ma le aufaigaluega a le Malo. O aiatatau uma lava ia o lea e aumai i le Tulafono lea, o lea foi e faafoe ai le tatou Malo ina ia amanaia ae le faapea e aafia ai na o i latou, ae le aafia ai le aufaigaluega a le tatou Malo. Leaga o puipuiga uma lava ia o la e faaalu uma i lalo o Tulafono po o fea lava le Tulafono, PSC po o Leoleo, o le tulaga lena, o le tiute foi lea o le Ofisa o le Loia Sili, e matua silasila totoa i vaega uma o le Malo ina ia faalaugatasia uma aiaiga nei mo le puipuiga o tagata faigaluega ma le latou aiatatau.

FOFOGA FETALAI: Faafetai, o lea ua maua le finagalo o le Afioga i le Taitai o le Itu Agai. Ia saunoa lau Afioga i le Minisita.

Tofa Hon LEATINUU WAYNE SOOIALO: Ia, faafetai atu lava i le sui usufono mo Faleata 3 i le agaga o lona manatu foi e aua tatou te faataitai fua i isi faalapotopotoga i fafo, ae o le faalavelave, e i ai lava le taimi tatou te usitai i ai pe a faapea o la e maua mai ai le tupe, ae a faapea tatou te le usitai, ia no money. Ae pei o le tulaga lea e i ai, e fai fuafua lava foi e le tatou faigamalo le tulaga lea, e vaai po o fea le itu e talafeagai mo tatou, ae o fea

le itu e talafeagai mo latou. Ia e pei o se auala lua foi lea e te alu atu e sau, ae le faapea o le a tatou taumafai lava e taofi tulaga ia. A o lea ua faamauiina lau Afioga le tulaga lea.

Faafetai atu foi i le Taitai o le Itu Agai. Ia ou te talitonu o le Afioga ia Tuilaepa ua matua malamalama lelei i tulaga ia i aafiaga o le feaiaai o Tulafono ia e lua, Tulafono a le PSC ma le Tulafono lea tatou te talanoaina i le taimi lenei. Ia, se i tilotilo i ai le faigamalo lenei, aemaise foi pe mafai ona feaiaai. A faapea e mafai ona feaiaai, ia o le a le mea e tuu ai? Atonu e manuia ai foi latou, a o lea ua faafofoga mai le PSC. O le mea foi lene sa ou le taofia ai le tele o saunoaga i le taimi ua tuanai, ina ia faafofoga mai pea le afaigaluega a le PSC i tulaga ia o lo o faataatia mai le aso. Ia o lea foi la ua toe faaopoopo mai le Afioga ia Tuilaepa, ia a o faafofoga mai le PSC, ia sue se Tulafono se Tulafono e mafai ona feaiaai ai Tulafono ia e lua. Ae aoga tele lau Afioga i le Fofoga Fetalai mo le agai i luma.

Susuga Hon Tuilaepa Fatialofa Auelua Sailele Malielegaoi: Lau Afioga i le Fofoga Fetalai, o se mea e fia faamalamalama.

FOFOGA FETALAI: Ia, se i tulai mai lau Afioga i le Taitai o le Itu Agai.

Susuga Hon Tuilaepa Fatialofa Auelua Sailele Malielegaoi: Masalo e le o maua mai e le Minisita, o le galuega lene a le Matagaluega a le Loia Sili e tilotilo ina ia ogatasi uma puipuiga o aiatatau a tagata, e le gata o tagata faigaluega a le Malo, a o tagata faigaluega foi i tua lea na i ai le Tulafono lea. E i ai itu faapena, ina ia aua ne i fesiliai a ia ogatasi.

FOFOGA FETALAI: Ia malo faafetai, atonu o lea ua maua mai le agaga foi o le fautuaga. O lea foi e faafogafoga mai lau Afioga i le Minisita, **ou te iloa o lea ua taatia atu.**

Tofa Hon LEATINUU WAYNE SOOIALO: Ia faamauiina mo le lumanai lau afioga. Ia faafetai lava.

Ona tatou oo mai lea i le tulaga i pemitā faigaluega e pei ona fesiligia foi e nisi. O lenei teuteuga o le a faafaigofie ai le faatinoga o galuega a le Matagaluega, ma toe siitia ai foi le auunaga mo le afaipisinisi o lo o manaomia ona faafaigaluegaina se tagata i nuu mai fafo. I lalo o teuteuga o le a tusi mai le mai le CEO a le MCIL ona iloilo lea e le Matagaluega ma fai faaiuga a le CEO. Mo le silafia o tatou pemitā faigaluega o lo o faagaioi lea i lalo o le... its like a one stop shop, e lavea ai ma le Ofisa lea o le Immigration, Matagaluega a le Palemia ma le Kapeneta, i lalo o le Ofisa o Femalagaaiga. O lenei faatinoga, e tasi lava le Matagaluega e auala mai ai talosaga, o le Immigration, a maea le iloiloa a le MCIL ona tuuina atu lea i le Ofisa o Femalagaaiga mo le laasaga mulimuli. I le vaai a le Matagaluega,

o lenei mataupu e tatau ona taatia i se tulaga tau le faatinoina o galuega masani, operational matters. Ae le o se isi tulaga e ala ai ona faatino ia tulaga.

O se tali fuaitau atu i le sui usufono o Faleata 3, sa faaalua lona manatu, o lo o i ai le feteenaiga o visa ma pemita faigaluega, e tatau ona muamua le visa i le pemita. E pei ona taua muamua, o le tuuina atu o pemita faigaluega o se galuega faifaatasi ma le Ofisa o Femalagaaiga. Ua tuufaatasia tualumaga mo le pemita faigaluega ma le visa e nofo i Samoa mo se taimi e le tumau po o se temporary. O lenei faatinoga e tasi lava le ofisa, e na o le Ofisa o le Immigration Division a le Ofisa o le Palemia ma le Kapeneta e uia, ma tuuina atu ai talosaga ina ia faafaigofie mo i tatou le aufaipisinisi ma faamalosia le fesootaiga o visa e nofo ai le tagatanuu mai fafo ma le pemita faigaluega. O lona uiga e tatau ona galulue faatasi le vaega lea.

Sa taua e nisi, e toatele i latou ua omai i totonu, sa omai i visa ia asiasi mai, visitors visa, ona omai lea i totonu, uma ifo ua apply i le Immigration mo galuega ia. Ona o le taimi ua tapunia ai a tatou border ua leai ni vaalele, lea sa pei e tau faamatagataga atu ai le tulaga lea, ina ia mafai ona apply. A o le mea sao lava ia, a uma loa lou visa na e sau ai, ua tatau foi ona e toe foi. O lo o toatele foi nisi o lo o aafia i le tulaga lea.

O le faauigaina o le upu faamasinoga. O lenei suiga ina ia mafai ai e nisi faamasinoga talafeagai. O le faataitaiga o le district court, ona faia se faaiuga i se mataupu i se feeseeseaiga tau galuega, ae le na o le faamasinoga sili o Samoa po o Supreme Court. O lea suiga o le a mafai ai ona faateleina ni avanoa mo le soalaupule o ia mataupu, feeseeseaiga tau galuega po o ni faasea tau galuega. E faaogaina ai auala tau faamasinoga ma ia vave ai ona maua se fofo o faafitauli tau galuega, nai lo le faatali se i avanoa na o le faamasinoga sili. E pei o tulaga ia, e amata atu lava i lalo o le tatou lower court ona ave i ai mataupu ia, ae le faapea o le a faatali lava se i ave i luga o le...

Soloia o le Tulafono Faatonutonu po o le Regulation. E faamauiina le manatu faatupu manatu e uiga i le Tulafono Faatonutonu. Mo le silafia, a maea ona pasia lenei Tulafono o Teuteuga ona talanoaina loa lea o le Tulafono Faatonutonu mo le limataitaiina o galuega a le Tulafono e pei ona masani ai. E aofia i Tulafono Faatonutonu tuutuuga ma aiaiga mo le faafaigaluegaina o fanau. O le faatinoga o galuega a ofisa asiasi ma isi foi tualumaga ua faamalosia o le Tulafono Teuteu ma le Tulafono Autu. O le tulaga lea, e pei ona ou fai atu i le taimi ua sola, o lea o lo o tilotilo le tatou Matagaluega i se capacity ma amata ona faataatia lelei ia fuafuaga ia, ona o lea ua pei ua tau lautele atu ia le tilotilo a le Matagaluega i tulaga ia. Ina ia lelei le asiasiga, ia lelei foi le... ina ia keep a tatou records ma mea faapena, ina ia a faapea e toe alu atu le asiasiga lona lua e le o faia lava le mea na faatonuina, ona maua ai lea o tulaga ia.

I le tulaga i tatou seila, ua faamauiina le tulaga lea mo le iloiloga a le Komiti o le Palemene, a o le agaga o le teuteuga ina ia puipuia tagata faigaluega i

luga o vaa. O lo o lesitala i lalo o le fua o Samoa, o lo o i ai le Tulafono o Vaa 1998 ma le feagaiga faava-o-Malo ma galuega i luga o vaa, Maritime Labour Convention. O le tulaga lea o lea foi sa momoli mai ai foi e le Taitaifono o le Komiti faa-Palemene, e ave i ai le tulafono lenei, ia se tasi foi o tama fanau a lo tatou atunuu, o lea ua le maua le tulaga ua oo i ai, ina ua misi. O lea la o lo o feteenai ai ma le Matagaluega lea o lo o vaaia seila, ae o lea e pei e foliga mai o lea e fai mai e refer i o i le kamupani lea sa faigaluega ai le tama. E tasi lea tulaga e tatau ona tilotilo i ai, po o ai uma i latou e tatau ona aafia i suesuega ia, ina ia maua se filemu foi o le aiga o lo o sau ai le atalii lenei i tulaga ia.

I le tulaga i livi, e le o i ai se teuteuga i lalo o le Tulafono e faatatau i study leave, livi mo aoaoga a i latou o faigaluega ma aooga. O lea tulaga mo ni livi mo aoaoga a o faigaluega po o study leave. E tuuina atu lava le filifiliga po o le pule, discretion, a le e ona le galuega e fai i ai sana fuafuaga tatau mo lana tagata faigaluega. O le taimi lenei e le o suia le Tulafono lea i le vaega lea o le Tulafono, o lo o tumau ai pea i le tulaga lea.

Ae pei ona ou fai atu, a i ai lava i latou o lo o manaomia e agai i o, po o le a le aafia o le toatele o le tatou atunuu o aafia i le tulaga lea, ina ia mafai ai ona faatino.

O livi o aso malolo faale-tausaga, annual leave. O le tusiga ma le agaga o le Tulafono, ina ia faamautu taiala aupito mauualalo, minimum standards e fai ai faaiuga tatau a latou e ana galuega. O le tulaga o livi faatausaga e tuuina atu i le faitalia a le tagata faigaluega ma le pule o le galuega mo le faaaogaina, e fua i le pisinisi galuega faatino. O le mea foi lea e lelei ai le private sector, aua o le toatele o i latou sa asiasia e le Matagaluega, e toatele i latou e le o alu i le minimum wage, e ova i luga i le tai \$5, \$6 o latou totogi. O lona uiga o lo o faatino pea e i latou e ona galuega tumaoti le latou discretion e faatino ai mea ia. So, a ave loa i lalo i le tulaga o le PSC, ua uma ona faataatia tulaga ia, e faigata lava ona sui. A o le taimi lenei, o lea ua aumai le mea lea, a o lea ua uma, ae le afaina.

O suiga fou ona o le tulaga lea o le faamai o le Koviti-19. O le matafaioi a le pisinisi po o le ana le galuega e faia tuutuuga talafegai ina ia mafai ona galulue mai ai i latou o tagata faigaluega, mai o latou maota. E le i oo muamua Samoa i se tulaga faapea, aua e le i ai se faamai ogaoga faapea na tulai mai ia i tatou, sa i ai le faamai muamua e pei na o fanau na i ai, e le i aafia ai matua ae sa i ai lava le tulaga na oo i ai. Ae fua lea i le ituaiga pisinisi ma le mafai e le pisinisi ona faatinoina o ia tuutuuga. O lona uiga e i ai pisinisi e mafai ona faatino ai le tulaga lea, ae i ai foi pisinisi e le mafai ona faatino i ai tulaga ia. O lo o i ai foi isi pisinisi tumaoti, o lo o totogi lava nai latou tagata i le taimi lea e le o maua i le Koviti-19. E le o nofonofo i se tulaga faapea e le o faatinoina. Ou te talitonu o lea o lo o faafofoga mai le Samoa Chamber of Commerce, aua o i latou ia e finau mai i mataupu ia, ae o lo o latou faatinoina foi mea, ina ia ogatasia ma tuutuuga a le Malo lea e i

ai. E pei ona silafia foi, o le afaigaluega a le PSC a mamai e maua le totogi, aemaise lava le tulaga lea e i ai. Ae o lea ua tuu le tuutuuga lea i faipisinisi ina ia mafai ona latou faatino ai le tulaga lea.

O le totogi maualalo po o le minimum wage, e pei ona ou fai atu i le taimi ua tuanai, o lea ua iloilo ina i totonu o le lua tausaga. E tele pisinisi foi e avatu loa e le Malo le minimum wage, ona nofo ai lava lea i ina, e atoa lava le sefulu tausaga, pe a le toe avatua se isi tulaga, o nofo ai lava. A o le tulaga lea ua i ai, o le a tuu i ai le lua tausaga e review ai a latou totogi maualalo. A alu atu la le asiasiga a le Matagaluega, ae maua ua atoa se tolu i le fa tausaga talu ona tumau lau minimum wage, e tataua ona e faatino loa, ina ia mafai ona siitia i luga. Aua e le mafai ona e nofo ai pea faapena, ma e faatalitali mai se i avatu le Tulafono a le Malo e sii ai i luga tulaga ia. A o le taua lea ua i ai, o lea ua toe tuu lava i tatou kamupani nei, ina ia fai lelei e i latou se fuafuaga, a uma le lua tausaga toe review le minimum wage. Ae pei ona ou fai atu, o le tele o pisinisi tumaoti o lo o i tua, e seasea ona toe i ai se isi i le totogi maualalo lea. Ua faatino foi e i latou le agaga ina ia fesoasoani ai i tagata faigaluega i le tulaga lea. O le totogi maualalo la lena a outou afioga.

O le manatu faatupu manatu....

FOFOGA FETALAI: Se i fai mai se malologa a lau Afioga i le Minisita. Ia tulai mai le sui usufono mo Faasaleleaga 5 lau Afioga Peseta.

Afioga Peseta Vaifou Tevagaena (Faasaleleaga 5): Ia faafetai mo le avanoa lau Afioga i le Fofoga Fetalai. Sa nofonofa lava ma taputapu pea i le saunoaga matagofie a lau Afioga i le Minisita. O lea ua oo tonu lava lau saunoaga i le tulaga foi lea o totogi, ae pei foi ona saunoa nisi foi o lenei Maota i le tulaga lea ona o le Tulafono. E moni lava e le o i ai i totonu o le tatou Tulafono o lo o talanoaina le tulaga lea, a o lea o lo o aumai ai le isi vaega lea i totonu o le Tulafono lea e talanoaina, o le tulaga lea o iuni o faafetauaiga. O lea e pei e sosolo mai ai le tulaga o totogi lea e pei ona ou faamalamalama atu, o le trade union. E foliga mai la ia te au, o lea lava e amanaia e le tatou Malo tulaga faava-o-Malo. O le tele o malo o le lalolagi e fausia uma a latou tulafono i lalo o iuni.

O le ala lea na ala ai ona ou avatua le tulaga foi lea i se totogi faaopoopo ia i latou o lea e aafia i lalo o le frontliner, e i ai leoleo, soifua maloloina mo se taimi e le tumau aemaise lava se galuega e aafia ai le soifua o le tagata faigaluega.

E pei o le tulaga lena na ala ai ona ou manatu, e lelei pea le avatu. E moni o lea e le o i totonu o le Tulafono, ae se i silasila i ai le Public Service Commission i le latou Tulafono Faavae lea e i ai, aua leaga o le tele lava o Matagaluega o lea e i lalo uma o le tatou Malo. O tupe foi ia e lafo mai fafo, o lea e aumai e malo tetele nei, o lea e faavae a latou tulafono i lalo foi o iuni. Ma o lea foi e aumai sao lava i le mea e agai i ai le tupe, e pei o le tulaga

lena. Afai o lea ua aumai ona o le faamai, e tatau ona silasila lau Afioga i le Minisita ma le Matagaluega, ia faapea foi le komiti ina ia fua se totogi ma ni tau i o i latou o lo o faatinoina le auaunaga, ona e fai lava si ogaoga o le faamai. E tatou te le iloa foi po o le a le isi virus lea e sosoo mai, po o se virus e oo mai loa o le a togafiti, te i ua... sili ona ogaoga lona aafiaga o le soifua ma le ola o tagata faigaluega, ae lafo atu pea i ina lau Afioga i le Minisita. Ma lou faaaloalo lava.

Tofa Lealailepule Rimoni Aiafi: Lau Afioga i le Fofoga Fetalai mo le faasaoina o le taimi.

FOFOGA FETALAI: E mo le faasaoina o lau Afioga i le Minisita, tulai mai le sui usufono o Faleata 3.

Tofa Lealailepule Rimoni Aiafi: Ona o lea sa mamafa lau faamatalaga i le vaega tonu lea ua oo i ai le faamalamalama a le Minisita, o lea foi ua fesoasoani le sui usufono o Faasaleleaga 5. I lenei vaitaimi ua tatou i ai, o se mea fou ua tupu i le lalolagi, e uiga i faamai. O lona uiga, e le toe mafai ona aloese ai, a o lea sa avatu le fautuaga, e tagai le... i le taimi lenei ua faatino ai le faatulagaga o le Tulafono, e tatau ona tuu i ai i totonu se vaega o le mea lea i puipuiga. O le puipuiga o le tagata faigaluega, aemaise foi e ou galuega i le taimi e toe tulai mai se faamai. Ina ia aua ne i i ai le feteenaiga lenei, o le omai o tagata faigaluega, e tatau pea ona totogi latou, ae fai atu foi le aufaigaluega, ia o le a totogi e leai ni tatou galuega o faia. Ae tatau ona i ai se... e toe tilotilo i ai aua e aoga mo le lumanai.

E le gata i lea, leaga o lea e faatulafonoina le totogiina o mea a le tatou Malo, o le NPF, o le ACC o mea faapena. E tatau foi ona tilotilo i ai i le vaega lea. A oo i taimi nei ua le totogia, ua leai se tupe e totogi ai tagata faigaluega, ma se income a le aufaigaluega, e tatau foi ona toe i ai se avanoa e faatalanoa ai vaega ia o le NPF ma le ACC, mea ia e compulsory le pay ina o tupe i ai, e tatau foi ona i ai se avanoa e fetuunai ai ina ia fesoasoani faatasi ai, i le taimi lea e tulai mai ai ia faafitauli nei.

FOFOGA FETALAI: O lea ua maua le finagalo o le sui usufono mamalu. Lau Afioga i le Minisita.

Tofa Hon LEATINUU WAYNE SOOIALO: Ua faafetai tele lava, o lea ua maea le folasaga lau afioga i le Fofoga Fetalai. O lea foi ua faamauina finagalo ua uma ona aumai e ese ma le taua. E le faapea e le o faatauaina e au nei aemaise foi le Matagaluega lea o faafofoga atu, i tulaga uma ia na outou aumaia i mataupu lenei.

Ia maumau e pe a na faapea a outou afioga, e mafai ona oo i ai ia le malosia o le Minisita e tasui uma mea tou te finagalo i ai. Ia ae peitai, o lena e tou te

silafia e i ai a tatou Tulafono, e le feaiaai le isi Tulafono i le isi Tulafono. Ia e le aia foi le Tulafono lea ma le Tulafono a le PSC, ae o le manaia ia o lua fautuaga.

Lau Afioga i le Fofoga Fetalai, momoli atu le faafetai tele i lau Afioga mo le avanoa ua mafai ona e aumaia faapea foi le mamalu o le aotelega lena o le taumafaiga a le Minisita ma le Matagaluega, ia ae tatou tatalo ia e tuu atu i le Komiti ina ia maua se tatou lipoti lelei, ia e aumai ai ni mataupu ua uma ona outou aumaia i lenei aso.

Ia manuia tele lenei fuafuaga, faafetai ma ia manuia.

FOFOGA FETALAI: Ua faamalo saunoa i lau Afioga i le Minisita, e talitonu foi o lau saunoaga auiliili lelei ma tolaulau maeaea o lea ou te talitonu o lea ua faafofoga foi sui usufono mamalu o le Maota sna laga ia o latou finagalo, ia o lea ua maea ia le saunoaga a le Minisita ma ua leai lava se tulimanu ou te talitonu e le i oooo i ai ia lana faamalamalama. Ia ae talitonu o lo o loma ia le tuuina atu i le Komiti, ia o lo o maua foi nisi avanoa o lo outou mamalu.

O le mea lea malo faafetai saunoa i lau afioga i le Minisita.

Na faamaonia le lafo ma faitauina le Tulafono Tau Faaofi o Teuteuga o le Tulafono o Sootaga Va Lelei o Leipa ma Galuega 2022 i lona faitauga faalua.

FOFOGA FETALAI: E tusa ai ma Tulafono Tumau 102(1) o le a tuuina atu le Tulafono Tau Faaofi o Teuteuga o le Tulafono o Sootaga Va Lelei o Leipa ma Galuega 2022 i le Komiti o le Vaega tau le Tamaoaiga mo le iloiloina ma toe lipoti mai i le Fono Aoao i se Fonotaga o lumanai e tusa ai ma aiaiga o Tulafono Tumau 166 (1).

Ia ua o tatou taunuu mai i le faaiuga o a tatou galuega sa faatulaga mo lenei aso ma o le taunuuga foi lea o mea uma i lenei aso aua le faamoemoe o le Maota. Ae muamua lava ona faailoa mo le silafia o sui usufono mamalu, ua ou molimau i le mafiafia o le tapenaga a le Komisi Faapitoa e ala i le latou lipoti na faataatia nei i le taeao. Ua ou manatu, e tatau ona lava se taimi e silasila ai lo outou maualuga i le lipoti. E le aoga ona faanatinati le soalaupuleina, ae ia i ai se avanoa e vailiili lelei ai le lipoti ma tapena lelei ai le tofa ma le faautautaga. E i ai le faamoemoe, o se aso Fono aupito lata mai, o le a faatulaga ai le lipoti a le Komisi Suesue Faapitoa, mo le lauliliuina e le tatou Maota.

O lenei aso ma le alofaiva o le Palemene, ua faamalo le usufono. Ae ina ne i matau mai, aisea ua le oo ai se... sau upu i le faavesivesi i le taeao nei, ia ma tau satia ai le Fofoga Fetalai. Le paia e o le Palemene, e le masani lou tagata i le teuloto o se faafitauli e tupu ai se maseiga i le va o au ma sou uso a tagata se i tulou. O a ni mea na tutupu i le taeao ua sola, e i ai le upu faapea,

e ui sa tau avaoto lo tatou alofaiva, ae talofa ua gase lau moeatai. Pe tatou te aloalo i le ilitea pe fofola foi le falauea, e pisi lava le vasa. A o aso foi ia, e iloa ai le tautai matapalapala. E taumafai lava le tiapolo e lepeti lo tatou nofo lelei.

Ae ua faamalo faafetai i tuleiga ma saunoaga, leaga o le faamatai e tu maualuga ai Samoa i le saofaiga a Palemene o le lalolagi. Alolofa tatou faagalo ia taimi. Tatou alo i luma ia lo tatou vaa, ma ia faaavanoa ia o tatou loto e afio faatupu ai Keriso e tautai i lo tatou vaa ona manuia lea o tatou faiva mo se ai i le tapuai mai a le atunuu, a ia sili, ia viia le Alii i mea uma tatou te fai.

O lou lava faamoemoe, ia mamalu le Palemene. Ou te fesili foi i le Atua i le ao ma le po, ina ia alofagia e Ia, o au o le tagata vaivai. E aumai foi e Ia manatu ou te faatino ai lou valaauina. Pe afai ua sala foi sau faatautaiga, ia alolofa ma faamagalo mai le Fofoga Fetalai. Ia ona ou tatalo atu ai lea, taoto i le Maota nei ni aga o lenei aso. O le Maota o lo o afio ai le Atua. O Ia o lo o faavae ai le Palemene ma Samoa. Tuu ia te Ia le tatou amo, ona mama lea o le tatou avega.

Samoa le atunuu pele, e asuasua atu vaimalu i puega ma faatoese atu lau Palemene, afai ua sala se gagana pe ua sipa foi se lamaga, ia tofomalie ma utagamalie, e malu lau Palemene i lau tatalo ma lau tapuaiga. E manuia le lumanai o lau Palemene i lou alofa ma lou finagalo faamagalo. Alofa ma faatafea i le auau o peau se sese o lau Palemene i lenei aso. Ae matou te manaomia pea lau tapuaiga mana ma ia manatua pea lau Palemene i au tatalo e le aunoa. Alofagia e le Atua lo outou valaauina, ia iai lana faauuga ma lana faatumuga. Ia saga faamanuia le Atua ia te oe le atunuu pele.

E momoli atu le faafetai i auaunaga uma o lo o tautuaina o le Palemene, Matagaluega o Leoleo, le auaunaga o Tineimu ma Faalavelave Tutupu Faafuasei, Matagaluega o le Soifua Maloloina, le 2AP ma le TV, le Kooline ma le Ofisa o le Fono, faafetai mo le tautua faaauau.

Pe a o tatou tatala i lenei aso, alofagia e le Atua le paia o le Palemene. O a ni feau o faatali mai e tualuga ai lenei aso, ia faamanuia le Atua.

Ae tatou te le i tolopo, ou te talosaga atu ai i le sui usufono mo le itumalo Palota o Vaisigano Nu.1, se i saunia se tatou tatalo e faaiu ai le tatou Fono.

Susuga Hon Tuilaepa Fatialofa Auelua Sailele Malielegaoui: Lau afioga i le Fofoga Fetalai, a o le i faia ia le tatou tatalo e talosaga lava pe maua se avanoa?

FOFOGA FETALAI: Ia saunoa maia lau afioga o lena ua e faafofoga mai...

Susuga Hon Tuilaepa Fatialofa Auelua Sailele Malielegaoui: Ua ou tulai atu e momoli atu le faafetai ma le faamalo i lou onosai foi ma le faapalepale.

Ia o upu lava a le tatou Fono a uma lava le Fono ua uma. Ua masani foi lau afioga e le o se taimi muamua lenei o lea ua tau matau ua lua au Paeaiga ua e masani foi i felafolafoaiga a le Maota nei ma upu faasino i tatou felafolafoaiga, e le milia faauu upu o le Fono.

Ae o upu lava e fai ia Lepea, e tetele lava i Pesega ae matua i le oo. O le mea foi lea e faapena a tatou Fonotaga a siisii foi le Maota nei, e tatou te fefaamagaloi.

E matou te momoli atu le faamalo, leaga e na o oe lou Nofoa ae toatele matou. O le mea lena, e matou te manatu ai e tatau lava ona momoli atu le matou faafetai i lou onosai. Ia a uma lava le aso, ua uma foi. O upu lava o le Fono ia, e nonofo lava i inei i le tatou Fono.

Ia o le tulai atu lea, o le faafetai ia faapena foi i le la Itu a fesiliai foi a tatou upu, o tatou lava ua o tatou masani i le faiga o tonu o le Maota lenei. E lagalaga, ia ae matua lava i le oo.

Ia manuia le tatou Fono.

FOFOGA FETALAI: Ia malo faafetai i le saunoaga a lau afioga i le Taitai o le Itu Agai. E talitonu foi e leai o lea lava ua e saunoa i tulaga tonu lava o le tatou faamoemoe ma le uiga o le tatou Fonotaga i lenei aso, ia malo le tofa. E talitonu foi lea ua faafofoga le Atua i lenei aso ma tulaga sa o tatou i ai. Ia o lea ua maua le toamalie, ae faamalo faafetai.

Ia lau Afioga i le sui usufono o Vaisigano Nu.1 tulai mai mo le tatou tatalo.

Na tolopo Taulumaga a le Fono Aoao Faitulafono i le itula e 12:57 i le aoauli seia aulia le itula e 9:30 i le taeao o le Aso Lua, 17 o Me 2022.